

百九十一
九十五

C40
4514
148



C40-4514



R 64853

阿毗達磨大毗婆沙論卷第 一百九十一

~~五百大阿羅漢等造~~

見蘊第八中念住納息第一之五

阿羅漢般涅槃心當言善耶無記耶答當言無記問何故作此論答欲令疑者得決定故謂阿羅漢已斷不善法成就善法或有便疑若爾阿羅漢應住善心而般涅槃欲令此疑得決定故明阿羅漢雖斷不善法成就善法然住無記心而般涅槃非善若先不作此論者則乃至于今善得是問阿羅漢般涅槃心當

言善耶無記耶彼不解放或作是答是善非無記以阿羅漢已斷一切不善法成就善法故由先作此論故乃至于今皆得正解由是因緣故造斯論問何故阿羅漢惟住無記心而般涅槃答惟無記心順心斷故謂善心強盛堅住難壞能令餘心長時續起於心斷不順無記心羸劣如朽敗種不堅住易壞不能令餘心長時續起故於心斷最爲隨順有說以無記心起過患少故謂善不善心由二門於生死中起多過患一由異熟果門二由等流果門無記心但由等流果門起過患非異熟果有說以阿羅漢背一切生故

謂餘有情將命終時爲當生故極作意力令善心起勿我當障諸非愛趣阿羅漢背一切生故不復作意但住無記心而般涅槃有說以阿羅漢不求起異熟器故謂餘有情求起當來異熟器故將命終時以極加行今善心起阿羅漢不求起如是異熟器故但住無記心而般涅槃有說阿羅漢住自性心入於涅槃自性心者卽無記心以生生中未嘗無故或有一衆同分中無善心起謂已斷善根未相續者或有一衆同分中無不善心起謂已離欲界染者無有一衆同分中不起無記心者是以說無記心名自性心惟住

此心入於涅槃有說阿羅漢要住如上親友心而涅槃故如人欲適他土親友追送其下親友至門而返中至村界上至國境如是阿羅漢趣涅槃時不善染汙心如下親友於離欲界及非想非非想處染時卽便捨離善心如中親友於起無記心時而便捨離無記心如上親友於般涅槃時乃便捨離有說此是阿羅漢漸捨生死法故謂離欲界染時捨一切不善心離非想非非想處染時捨一切染汙心起無記心時捨一切善心入無餘依涅槃時捨一切無記心尊者妙音說曰一切善心皆是作功用起將命終時不能

復作功用是故惟住無記心而般涅槃問阿羅漢最後心爲何所緣耶有說緣自身中諸根大種有說緣內六處有說緣外六處有說緣十二處尊者說曰阿羅漢最後心爲何所緣答緣自身彼於自身作無命離命者想空解脫門現在前而般涅槃有說彼心緣一切行以於諸行深見過失無願解脫門現在前而般涅槃有說彼心緣涅槃以於涅槃觀寂靜功德無相解脫門現在前而般涅槃應知此中依阿羅漢相續命終心說非剎那最後心以彼心惟無記故大德說曰阿羅漢最後心緣所見聞覺知境以彼心是異

熟生自體所攝由先業行盡故自然斷滅如陶家輪
勢極則止何故雙賢弟子先般涅槃然後佛耶答彼
二尊者先長夜中造作增長感無斷業勿空無果異
熟故由二因緣彼二尊者求如是處發起此業一以
見爲先故二以聞爲先故見爲先者彼二尊者過去
曾見先三藐三佛陀雙賢弟子先般涅槃然後彼佛
聞爲先者彼二尊者過去曾聞先三藐三佛陀雙賢
弟子先般涅槃然後彼佛旣見聞已而便引起隨順
彼因諸我所行若戒若禁苦行梵行一切迴向願我
未來得住如斯善士行類恒與大師現受法樂而無

間斷若佛先般涅槃然後雙賢弟子者則彼所造作
增長感無斷業應空無果異熟問一切造作增長感
無斷業無如佛者若雙賢弟子先般涅槃則佛感無
斷業便空無果異熟豈雙賢弟子感無斷業於佛爲
勝耶答弟子於師有二種受用勝一財受用二法受
用師於弟子有一種受用勝謂財非法然造作增長
感無斷業但爲法故非爲財故是以無前過失問雙
賢弟子中般若勝者復先涅槃非神通勝者神通勝
者於彼既失法受用義云何非感無斷業空無果異
熟耶答般若勝者無如世尊彼雖涅槃以世尊在故

於法受用非空無果復次由法爾故雙賢弟子先佛般涅槃何謂法爾謂法應如是不可改易不可徵詰是法爾義此顯一切諸佛雙賢弟子法應先佛而般涅槃此理無異有說與轉輪王相似法故如轉輪王欲往彼彼未至方域必令前軍勇將先導而往如是上力法轉輪王欲往未至無餘依涅槃界亦令如前軍勇將雙賢弟子先導而往有說欲令所化有情入佛法故謂有所化有情雖近佛而住盡衆同分不欲來詣佛所受行佛法若見雙賢弟子般涅槃時便於生死厭怖來詣佛所受行佛法有說爲解所化有情

愁憂心故謂若佛先般涅槃則無有能解所化有情愁憂心者若雙賢弟子先般涅槃則有如來能於兩四月中依彼及自說無常教解彼愁憂令修勝行有說欲令所化有情於佛當般涅槃預繫念住故謂由雙賢弟子先般涅槃所化有情便作是念佛亦不久當般涅槃以雙賢弟子已涅槃故如天欲雷必先掣電若不以電爲先而震雷者則令怯弱有情聞之驚懼或復致死是故天欲雷時愍有情故先流電耀彼既知已虛心待之雖聞叱雷則無驚駭如是若佛先般涅槃者則令一類於佛慕戀渴仰有情驚怛悶絕

若雙賢弟子先涅槃者則令彼類預起如來般涅槃想至佛涅槃則無悶絕故有頌言

恒作無常想 変壞則無憂 如覩電爲先
聞雷不驚怖

有說爲息謗故謂有外道恒謗佛言沙門喬答摩攝受鄖波底沙及俱履多故夜從諮受晝爲他說若彼二人般涅槃已世尊說法不異先時則諸外道誹謗皆息有說爲顯世尊不久住世必當般涅槃故如世界將欲壞時蘇迷盧山數爲難陀鄖波難陀二大龍王纏遶捨去諸天見已卽知世界不久當壞如是尊者舍利子大目犍連先般涅槃世便知佛不久滅度由如是等種種因緣故雙賢弟子先般涅槃然後佛滅問何故具壽蘇跋陀羅先般涅槃然後佛耶答亦由法爾故謂諸佛法爾最後弟子先般涅槃然後佛問何謂法爾答法應如是不可改易故名法爾此顯一切諸佛法應後最後弟子而般涅槃此理無異有說與轉輪王相似法故如轉輪王欲入園苑勝地遊戲必以諸莊嚴具嚴飾最小王子令其先入然後自往如是十力無上法王將欲入如園苑勝地無餘依涅槃界亦先以菩提分法莊嚴最後弟子令先涅槃

然後自往有說尊者蘇跋陀羅作是念一切同梵行者皆在我前入有餘依涅槃界由其志願故彼先佛而般涅槃有說彼尊者作是念如受爾所聖教功德還受爾所生死過患我既不能領受聖教衆多功德何須久住領受生死衆多過患故彼先佛而般涅槃有說彼尊者怖畏多受利養恭敬故謂拘尸城諸力士等先於彼尊者起大師想復知彼得阿羅漢果彼尊者作是念若佛般涅槃後彼必於我大設供養幸因佛未涅槃諸力士等供養世尊未暇相及我當先佛而

般涅槃有說彼欲斷絕諍根本故謂彼尊者作如是念若我後佛般涅槃者外道謂我是彼同類諸苾芻復言是我同類因此便興種種鬭諍彼觀未來有如是事是故先佛而般涅槃有說欲顯世尊於最後位教化功德亦無減故謂或有作是念世尊功德退減而般涅槃故彼尊者欲顯世尊於最後位亦能教化有情令功德圓滿謂令入無餘依涅槃界由如是等種種因緣故彼先佛而般涅槃如說世尊依不動寂靜定而般涅槃世間眼滅此爲在定爲出定耶答出定問何故作此論答欲令疑者得決定故謂契經說

論

大藏經卷一百一十一

十一

廣

世尊依不動寂靜定而般涅槃世間眼滅或有疑佛在定而般涅槃欲令此疑得決定故明佛出定而般涅槃故作斯論此中不動寂靜定者謂有欲界無覆無記心相應定似第四靜慮故名不動寂靜佛依此而般涅槃西方健馱羅國諸師作如是說如說世尊入第四靜慮而般涅槃世間眼滅此爲在定爲出定耶答出定問佛具入四靜慮而般涅槃何故但言入第四靜慮耶答雖亦入前三靜慮而非堅著若入第四靜慮卽便堅著故偏說之有說爲入第四靜慮故入前三靜慮是故偏說第四有說前三靜慮猶如在

路第四靜慮是正所往是以偏說有說佛將般涅槃時從第四靜慮起入第三靜慮近分從第三靜慮近分起入第二靜慮近分從第二靜慮近分起入初靜慮近分從初靜慮近分起欲界善心現在前欲界善心無間欲界無覆無記心現在前卽住此心而般涅槃以前三靜慮但入出近分非根本第四靜慮入出根本是故偏說尊者妙音說曰佛將入涅槃時第四靜慮無間欲界善心現在前欲界善心無間欲界無覆無記心現在前卽住此心而般涅槃問豈有能從第四靜慮無間卽起欲界善心耶答有謂佛非餘問

論

法華經疏卷一百一十一

八

廣

何故佛般涅槃時最後入第四靜慮耶答過宛伽沙
 數如來應正等覺法皆如是次第入定而般涅槃謂
 一切佛般涅槃時最後法爾入第四靜慮從彼起已
 而般涅槃有說欲顯佛於彼定極自在故雖將涅槃
 而猶現入若不爾者應不能現前有說佛欲悲愍後
 世生故謂佛滅後有諸衆生當作是念世尊具一切
 智臨涅槃時尚入第四靜慮況我等不於諸等至中
 勸作加行耶由此勤修一切等至有說與轉輪王相
 似法故如轉輪王若先於此地灌頂而受王位後即
 於此地而命終如是十力無上法王先依第四靜慮

受法王位後還依此地而般涅槃有說與大富商王
 相似法故如富商王最後轉易大價珍寶而無戀著
 如是世尊最後棄捨殊勝第四靜慮而無戀著世尊
 臨般涅槃時先起欲界善心從此無間入初靜慮從
 初靜慮入第二靜慮如是次第乃至從無所有處入
 非想非非想處從非想非非想處無間入滅受想定
 從滅受想定無間入無所有處從無所有處入非想
 非非想處從非想非非想處入識無邊處從識無邊
 處入無所有處從無所有處入空無邊處從空無邊
 處入識無邊處從識無邊處入第四靜慮從第四靜

慮入空無邊處從空無邊處入第二靜慮從第三靜慮入第四靜慮從第四靜慮入第二靜慮從第二靜慮入第三靜慮從第三靜慮入初靜慮從初靜慮入第二靜慮從第二靜慮入第三靜慮從第三靜慮入第四靜慮從第四靜慮起便般涅槃如是世尊臨涅槃時四度入第四靜慮前三入時未名不動寂靜定第四入時乃名不動寂靜定所以者何前三入時不緣涅槃第四入時乃緣涅槃故問何故世尊臨涅槃時不順超入諸定而但逆超入耶答過宛伽沙數如來應正等覺法皆如是超入諸定有說欲顯世尊於諸定得自在故所以者何若有於定得自在者乃能不因順超入而便逆超入若於諸定不自在者尚不能順超況能逆超而入諸定有說欲顯世尊能作難作事故謂不順超而能逆超入諸定者此事爲難非如順超入已方逆超者有說爲欲顯世尊威力大故世尊威力乃能不順超而逆超聲聞獨覺若不順超卽不能逆超而入諸定有說爲欲兼入滅盡定故謂佛爾時若順超入諸定者則無容入滅盡定所以者何以滅盡定要從漸次非想非非想處以無間現在前故如是佛般涅槃時則不應現入一切靜慮解脫等

持等至然佛般涅槃時決定現入一切靜慮解脫等持等至是故不順超入諸定而逆超入諸定問世尊何故臨般涅槃現入一切靜慮解脫等持等至耶答過宛伽沙數如來應正等覺法皆爾故謂一切佛臨般涅槃法皆現入一切靜慮等持等至有說欲顯世尊於諸定得自在故謂若於諸定得自在者臨般涅槃時猶能現入若於諸定不得自在餘時尚不能現入況臨般涅槃有說佛爲悲愍後時諸有情故謂佛般涅槃後有諸有情當作是念世尊具一切智臨般涅槃尚現入一切靜慮解脫等持等至況我等於彼

不勤作加行耶由此勤修靜慮解脫等持等至有說爲欲熏修所留設利羅故又爲資養羸瘦身故又爲淮陀工巧之子福田增廣故又爲止息因碎身所生身中諸苦受故有說與大富商王相似法故如巨富商王臨命終時開諸庫藏觀閱財寶付囑子孫然後捨命如是世尊爲無上正法商王臨涅槃時開功德庫藏觀閱一切靜慮解脫等持等至諸法財寶付囑弟子然後涅槃尊者妙音說曰世尊自顯不退法故謂佛成就一切功德於一切境智得自在臨般涅槃猶能現起一切靜慮解脫等持等至如契經說世尊

在拘尸城力士生處雙娑羅林間而般涅槃問世尊
何故在拘尸城般涅槃耶答爲欲化度拘尸城中諸
力士故又爲攝化外道蘇跋陀羅故又爲令大力士
補羯娑種獨覺菩提種子故又令彼妻種無上正等
菩提種子故有說爲止拘尸城中諸力士等被輕懥
事故謂佛若於餘大城中般涅槃者此小城中諸力
士等便被輕懥不得如來遺身一分故佛於此而般
涅槃有說爲廣流布佛身界故若佛於餘大城般涅
槃者彼諸人衆難可摧伏於佛身界或生保恪則不
可分布若拘尸城般涅槃者諸力士等身心勇健心

勇健故樂爲分布身勇健故不爲他伏樂分布故令
佛身界廣得流布有說欲顯佛雖臨般涅槃而於世
間猶受增上富貴果故謂佛若於諸餘大城般涅槃
者則所受供養雖過輪王多百千倍未爲奇特若雖
於此極小邊城入於涅槃而所受供養猶過輪王多
百千倍乃爲奇特有說佛曾於此數數捨身命故如
彼經說佛告阿難乃至拘尸城有金河雙娑羅林諸
力士等增制多界分周帀正等十二踰繕那地如來
於此六返捨轉輪王身命今第七返捨如來應正等
覺身命阿難當知我不見於此地處或東或南或西

或北如來更捨第八身命所以者何如來諸有道斷生死永盡無後有故如說佛告阿難汝應往雙娑羅林間爲佛敷設北首臥牀如來於今日中夜當於無依涅槃界而般涅槃乃至廣說問世尊何故令敷設北首臥牀而臥耶答欲顯彼國論師法應爾故謂彼國論師皆敷設北首牀而臥世尊亦爾以佛能伏諸論師故即是無上第一論師故令隨彼敷設而臥有說欲顯遠離世所妄執吉祥事故謂彼國死者乃令牀上北首而臥佛爲破彼妄吉祥執是故未般涅槃卽令敷設北首牀而臥有說欲止拘尸城中諸力士

等不淨心故謂彼國俗皆於北方建立天祠若佛北足而臥者則諸力士生不淨心云何欺我我等所事北足而臥有說爲欲顯佛恭敬正法故謂佛頂知般涅槃後無上法炬北方熾然久久不滅故於牀上北首而臥有說佛欲顯已於一切時所作漸勝故謂佛三無數劫來所起善根漸漸增勝無有萎歇故令首趣勝方而臥以北方是勝方故有說佛欲顯北方人衆漸增廣故謂佛預知般涅槃後北方人衆漸漸增廣故令敷設北首牀而臥如說爾時世尊趣所敷牀右脇在下壘足西面北首而臥住光明想具念正知

1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

乃至廣說問世尊何故右脇而臥答欲顯佛如師子王而臥故如契經說臥有四種謂師子王臥天臥鬼臥耽欲者臥左脇著地佛是無上人中師子故右脇而臥有說欲顯世尊如說而作故謂契經說佛告阿難汝等應學師子王臥佛是如說而作者既勸人右脇而臥故自亦爲之間世尊何故臥般涅槃而不坐耶答欲令大衆於佛一切身分易了知故有說若佛臥涅槃者則身度量現可了知不待分別有說欲顯如來離矯詐故若佛坐涅槃者卽不信者當作是言此

是矯詐何有死人而能端坐有說爲止當來於諸聖者生誹謗故若坐般涅槃者則於今時諸阿羅漢身力羸劣臥入涅槃世便謗言非阿羅漢若是者何不同佛坐涅槃耶有說爲斷恃力者惰慢心故謂彼見佛臥般涅槃咸作是念世尊一身分皆具那羅延力尚爲無常所逼不能正坐況我等輩凡下微弱而恃少力生憣慢耶問世尊何故於中夜分而般涅槃答以此時最寂靜故謂彼土暑熱晝時不堪作務多於初夜後夜分中作諸事業惟中夜分一切寂然如來恒時愛樂寂靜讚美寂靜故於中夜而般涅槃有

說欲顯佛於增減事善節量中不須更捨離故謂佛留初夜分命捨後夜分壽復於中夜分中留前捨後於其中分而般涅槃有說佛欲令大衆於生死黑暗起大厭怖故謂佛於迦粟底迦月白半八日中夜而般涅槃爾時月輪沒於山頂如是佛正徧知月亦隱靜慮大涅槃山卽時二種黑暗俱起謂色性暗及無明暗時諸大衆覩斯事已便於生死起大厭怖故於中夜而般涅槃有說佛一切時樂處中行故謂佛昔爲菩薩時於最後天生中生處中覩史多天處於最後人生中生中印度劫比羅筏窣堵城於中夜分喻

城出家習處中行證無上覺爲益有情說離有無處中妙法於夜中分而般涅槃如說爾時阿難白佛言世尊此拘尸城中有如是如是力士并男女大小僮僕作使親友眷屬一切歸依世尊及法并苾芻僧受諸學處乃至廣說問別解脫律儀由自表得云何彼力士等所受戒由他表得耶答佛神力故謂戒皆由自表而得然佛臨涅槃時以佛威力令力士等戒亦由他表而得有說尊者阿難先曾入拘尸城已授諸力士等三歸學處今但白佛令知欲顯諸力士等是佛真實弟子及顯如來於最後位猶能攝受諸新學

輩是故世尊弟子具足非如外道至臨終時弟子離散有說別解脫律儀亦更有餘從他表得如半迦尸女等雖自表不大明了而由他表力故亦得別解脫律儀如說佛告苾芻從今已往及我滅度後不應輒度外道出家與受具戒惟除釋種及事火多髮外道若有釋種作外道服來求出家汝等卽應度令出家與受具戒所以者何我之眷屬應開許故乃至廣說問世尊成就徧行大悲何故惟令開許自眷屬耶答有諸釋種先歸依外道未歸依佛今方便攝受故發此言謂因惡王毗盧擇迦誅戮劫比羅筏窣堵城諸

釋種故有餘釋種以怖畏故依外道出家偷存身命佛爲彼故義言汝等以怖畏故依外道出家受彼法服今無怖畏必應還來歸依佛法故我勑諸弟子特令度彼因此無量釋種外道來歸佛法有說爲欲誘引未入佛法增上慢釋種令人佛法故謂有釋種增上慢纏心故盡衆同分不來見佛如來說此語已便般涅槃彼聞之當作是念佛豈不以我爲眷屬故臨般涅槃猶垂哀愍由此無不發淳淨心來歸佛法出家受戒尊者世友說曰如來爲令釋種眷屬積集增廣殊勝善根故臨涅槃以爲付囑如契經說爾時

世尊袒上身分告苾芻衆曰汝應觀我汝應察我所以者何如來應正等覺難可出現難可得見過滬曇跋羅莘問世尊何故袒上身分告苾芻衆汝應觀我乃至廣說答假如有人習奢摩他滿十二歲所生善品不如於須臾頃觀察佛相好之身所獲功德此中佛語義言我三無數劫所集福聚乃至未作灰聚以來汝等宜應諦仰觀察求堅固法問汝應觀我汝應察我有何差別答汝應觀我者謂以眼識汝應察我者謂以意識復次應觀我者謂以無分別心應察我者謂以有分別心復次應觀我者謂於現在應察我者謂於未來復次應觀我者謂於生身應察我者謂於法身復次觀我者謂觀所集察我者謂察所證復次觀我者謂觀所狀察我者謂察所欣復次觀我者謂觀相好察我者謂察功德是謂觀察差別如契經說汝等苾芻且可裁默應觀諸行是盡滅法此是世尊最後教誨問世尊何故說此語耶答諸苾芻等以佛將涅槃故極懷愁惱展轉悲號佛欲止其悲哀令生觀行故說是語此中汝等苾芻且可裁默者令住正念應觀諸行是盡滅法者令起正知復次可裁默者令修奢摩他觀諸行者令修毗鉢舍那復次可裁

默者令止憂悲觀諸行者令起觀行尊者妙音說曰汝等苾芻且可裁默者欲止他悲哀應觀諸行是盡滅法者顯自成就無忘失法此中佛語義言我成就未久已作是說

諸行無常 有生滅法 以起盡故
彼寂爲樂

今復依彼說言諸行是盡滅法豈非我成就無忘失法耶

阿毗達磨大毗婆沙論卷第一百九十一

說一部發合

音釋

羸劣羸力追切病也微詰徵陟陵切驗也驚惱驚
卿卿切憎貳陀陟駕切駭下格切怛當割切諮旨移
涉涉切瞿也怒怒也憚驚也怛瞿也諮切訪
問問切誹謗謗誹補曠切訕也機莫結切喻繕那梵語
也也切誑古況切欺也劫比羅劫比羅跋窣堵云能仁住
虔宰蘇沒虔宰蘇沒切堵堵音視誅戮竹切誅戮殺也漚曇跋羅華優曇
鉢羅梵語也此云端應

曇徒南切跋蒲發切

栴城弟子趙士先施贊刻此
阿毗達磨大毗婆沙論第一百九十一卷

字七千二百二十九箇該銀三兩六錢一分
雙足庵釋真慧對長洲徐普書旌德劉光彩刻

萬曆丙辰歲仲秋八月徑山化城識

阿毗達磨大毗婆沙論卷第一百九十二

五百大阿羅漢等造

唐三藏法師玄奘奉詔譯

見蘊第八中念住納息第一之六

爾時世尊說此語已便入初靜慮次第乃至入滅盡定時尊者阿難卽問尊者阿泥律陀言世尊今者已般涅槃耶答言未也但是入滅盡定耳復問云何知耶答言我親從佛聞世尊入第四靜慮依不動寂靜定而般涅槃世間眼滅問尊者阿難爲知故問爲不知耶若知者何故復問若不知者云何名知佛心耶

1 2 3 4 5 6 7 8 9 10

1 2 3 4 5 6 7 8 9 10

有說彼尊者知之問若爾者何故復問答亦有知而故問爲發起言論故如說世尊知而故問復次尊者阿難欲顯尊者阿泥律陀有勝德故雖知而問謂彼尊者雖有勝德而衆不知欲令其知是以故問有說彼尊者不知問若爾者云何名知佛心耶答佛出定已阿難知其前心而彼時不知者以佛猶在定故復次彼尊者若住常性心時能知佛心爾時彼心由二憂惱所覆沒故不知佛心一者失眷屬憂惱二者失大師憂惱問尊者阿泥律陀云何知耶有說世尊臨涅槃時入共聲聞等至故彼得知評曰不應作是說

以佛爾時現入不共一切聲聞獨覺靜慮解脫等持等至故問若然者彼云何知答世尊爾時起共聲聞獨覺入出定心彼由此知是彼境故猶如象王渡深河時若正在河中則人無知者但觀入出水跡則知象王所入出處如是世尊若住甚深等至河時一切聲聞獨覺不能現見但觀如入出水跡入出定心便知入如是定從如是定出如說爾時尊者大迦葉波作是念我當以何滅梵如來身火尋作是念我今應以香乳滅之卽起心時便有四道香乳從空而下由此今焚如來身火一時而滅問何故必以香乳滅梵

如來身火耶答欲顯與諸仙人相似法故謂彼國俗若仙人命終卽以乳滅焚身之火若受欲者命終卽以酒滅焚身之火佛於諸仙中勝卽是第一仙人故今亦以香乳滅火復次欲令佛設利羅極清淨故以乳灌之復次佛生身是乳所長養故今設利羅亦以乳浴之復次乳性肥而能滅火或有物雖性肥而不能滅火乃令其熾如酥油等有物雖能滅火而性不肥如水酒等惟乳性肥又能滅火故惟以乳由此義故尊者大迦葉波現四道香乳用滅如來焚身之火如說爾時尊者阿難佛涅槃已經七晝夜右燒焚如

來火聚說伽他言

千衣纏佛葬 惟二衣不燒 謂外及餽身
此爲奇特事

問何故世尊惟二衣不燒耶答有信敬佛諸天神等威力所持令不燒故有說是佛願力所持令內外淨故謂一衣在內持如來駛都令不散染一衣在外持所有灰令不飄全有說此表如來正法有內外二種護故內護者謂清淨苾芻苾芻尼等外護者謂淨信國王大臣等此則正法威力令其不燒有說此表如來内心外身俱清淨故心清淨者謂已永離一切煩

惱并習氣故身清淨者謂從最勝相異訣業所引生
故如說四有謂本有死有中有生有有聲目多義如
前廣說此中有聲說屬衆同分有情數五蘊名有云
何本有答除生分死分諸蘊中間諸有此即一期五
蘊四蘊爲性問何故此有說名本有答此是前時所
造業生故名本有問若爾餘有亦是本有皆前時所
造業所生故答若是前時所造業生麤顯易覺明了
現見者說名本有餘雖前時所造業生而微隱難覺
非明了現見是以不說云何死有答死分諸蘊即命
終時五蘊四蘊爲性云何中有答除死分生分諸蘊

中間諸有即二有中間五蘊爲性問何故此有說名
中有答此於二有中間生故名中有問若爾餘有亦
是中有皆於二有中間生故答若於二有中間生非
趣所攝者名中有餘雖二有中間生而是趣攝不名
中有云何生有答生分諸蘊即結生時五蘊四蘊爲
性問此四有幾刹那幾相續答二刹那謂死有生有
二相續謂餘有問此四有幾染汙幾不染汙答皆通
二種問此四有心幾染汙幾不染汙答生有心惟染
汙餘心染汙不染汙問此四有幾有漏幾無漏答皆
惟有漏問此四有時心幾有漏幾無漏答二惟有漏

謂死有生有時心二通有漏無漏謂餘有時心問此
四有時幾起同分心幾起不同分心答二惟起同分
心謂死有生有時一起同分不同分心謂餘有時諸
欲有彼一切有五行耶乃至廣說此中諸蘊以行聲
說過去如來應正等覺說蘊爲行今釋迦牟尼如來
應正等覺說行爲蘊以先佛說五行今佛說五取蘊
故此阿毗達磨中說五行者欲顯今佛所說五蘊即是
先佛所說五行故問何故先佛說蘊爲行今佛說
行爲蘊耶答佛觀所化有情隨所應而說故謂先佛
所化應聞說行而得正解今佛所化應聞說蘊而得

正解問何故名行答流轉故名行謂前生諸蘊由後
生諸蘊故流轉或後生諸蘊由前生諸蘊故流轉若
生欲界以欲界心爲同分心與彼命根衆同分爲同
分故以色無色界及無漏心爲不同分心不與彼命
根衆同分爲同分故若生色界以色界心爲同分心
以欲無色界及無漏心爲不同分心若生無色界以
無色界心爲同分心以無漏心爲不同分心諸欲有
彼一切五行耶設有五行彼一切欲有耶答應作四
句有欲有非五行謂欲界有情住不同分心及住無
想滅盡定彼時欲有惟二行故有五行非欲有謂色

論

方正學之說卷二十一

三

序二

界有想天住同分心若無想天不得無想爾時皆具五行彼無想天有心位必不起不同分心故而彼行非欲有有欲有亦五行謂欲界有情住同分心彼時欲有具五行故有非欲有亦非五行謂色界有想天住不同分心及住無想滅盡定若無想天得無想若生無色界爾時但有二行或四行或一行彼行又非欲有故諸色有有想天彼一切五行耶設五行彼一切色有有想天耶答應作四句有色有有想天非五行謂色界有想天住不同分心及住無想滅盡定爾特色有有想天皆惟二行故有五行非色有有想天

謂欲界有情住同分心若無想天不得無想爾時雖皆五行而彼行非色有有想天故有色有有想天亦五行謂色界有想天住同分心爾特色有有想天具五行故有非色有有想天亦非五行謂欲界有情住不同分心及住無想滅盡定若無想天得無想若生無色界爾時但有二行或四行或一行彼行又非色有有想天故諸色有無想天彼一切二行耶設二行彼一切色有無想天耶答應作四句有色有無想天非二行謂無想天不得無想爾時彼色有無想天具五行故所以如前有二行非色有無想天謂欲界有

1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

情住不同分心及住無想滅盡定若色界有想天住
 不同分心及住無想滅盡定爾時雖皆二行而彼行
 非色有無想天故有色有無想天亦二行謂無想天
 得無想爾時彼色有無想天惟二行故有非色有無
 想天亦非二行謂欲界有情及色界有想天住同分
 心若生無色界爾時乃有五行或四行或一行彼行
 又非色有無想天故諸無色有彼一切四行耶設四
 行彼一切無色有耶若諸四行彼一切無色有非欲
 色界有情有四行故有無色有非四行謂無色界有
 情住不同分心爾時彼無色有惟一行故頗有有五

行耶乃至廣說問何故復作此論答前文雖成立有
 二行有而未遮止有三行有亦未成立有一行有今
 爲遮止有三行有及欲成立有一行有故作斯論頗
 有五行耶答有謂欲界有情及色界有想天住同
 分心若無想天不得無想彼必有自地現在五行故
 頗有有四行耶答有謂無色界有情住同分心頗有
 有三行耶答無以無有情三蘊成故所以者何心心
 所法定不相離受思想等恒相應故頗有有二行耶
 答有謂欲界有情及色界有想天住不同分心若住
 無想滅盡定若無想天得無想彼但有二行故頗有

有一行耶答有謂無色界有情住不同分心彼但有一行故頗有有無行耶答無以無有情非蘊成故一切有情必有自地命根等故

見蘊第八中三有納息第二之一

諸捨欲有欲有相續彼一切欲界法滅欲界法現在前耶如是等章及解章義既領會已應廣分別然有聲目多義此中說屬衆同分有情數五蘊名有如說欲界死生欲界彼一切欲有相續耶乃至廣說彼亦說屬衆同分有情數五蘊名有如說諸纏所纏地獄有相續彼初所得諸根大種與此心心所法爲一增

上乃至廣說又復如說欲有相續時最初得幾業所生根乃至廣說又如說四有謂本有死有中有生有當知彼文皆說屬衆同分有情數五蘊名有如說頗勒窶那識食所引能感後有令其現前彼說續生時心眷屬名有如說阿難陀如是業有能牽後有彼說牽後有思名有如說取緣有彼說分位五蘊名有尊者妙音說曰彼說牽後有業名有如說云何有法謂一切有漏彼說諸有漏法名有如說七有謂地獄有傍生有鬼界有人有天有業有中有彼說五趣五趣因五趣方便名有如說欲有云何謂業能感欲界後

有乃至廣說彼說業及異熟名有不說取所緣有問
若爾彼後所說當云何通如說欲有欲界一切隨眠
隨增乃至廣說欲有五部業皆能感異熟可說欲界
一切隨眠隨增色無色有惟修所斷業能感異熟如
何可說色無色界一切隨眠隨增耶答後文應作是
說欲有欲界一切隨眠隨增色無色有色無色界徧
行及修所斷隨眠隨增應作是說而不說者當知彼
說有及眷屬悉名爲有和合有法亦名有故有餘師
說前說業及異熟名有不說取所緣有後說業及異
熟名有亦說取所緣有彼不應作是說諸作論者依

章立門不可章所說異門所說異是故如前所說者
好問何故名有答能有能非有故名有問若爾聖道
應名有聖道亦是能有能非有故答若能有能非有
能長養攝益任持諸有者名有聖道雖能有能非有
而於諸有損壞離散故不名有復次若能有能非有
能令諸有相續流轉令老死道不斷者名有聖道雖
能有能非有而令諸有不相續不流轉斷老死道故
不名有復次若能有能非有是趣苦集行趣有世間
流轉生死老死集行者名有聖道雖能有能非有而
是趣苦滅行趣有世間流轉生死老死滅行故不名

有復次若能有能非有是有身見事顛倒事隨眠事
愛事貪瞋癡安足處有垢有毒諸有所攝墮苦集諦
者名有聖道雖能有能非有而非有身見事乃至愛
事非貪瞋癡安足處無垢無穢無濁無毒非諸有攝
不墮苦集諦故不名有有餘師說是苦器故名有問
若爾此亦是樂器如說大名若色一向是苦非樂非
隨順樂不增長喜樂惟是離樂因者則諸有情不應
於色起貪起染大名以色非一向苦亦是樂亦隨順
樂亦增長喜樂非惟是離樂因故有情於色起貪起
染又佛決定建立三受不相雜亂謂樂受苦受不苦

不樂受如是有漏法亦是樂器何故但說是苦器故
名爲有耶答以苦多故謂生死中苦多樂少順苦法
多順樂法少以樂少故置在苦品如一滴蜜墮毒器
中不名蜜器猶名毒器以毒多故此亦如是復有說
者可怖畏故名有問若爾涅槃應亦名有如說苾芻
諸愚夫類無聞異生於涅槃中生大怖畏謂我不有
我所不有我當不有我所當不有彼於涅槃既生怖
畏是則涅槃亦應名有答於有生怖是則爲正於涅
槃生怖是則爲邪以涅槃非可怖故由此不名爲有
復次若令異生聖者皆生怖畏乃名爲有涅槃但今

論

大藏經卷二十一

廣二

異生生怖故不名有相續有五一中有相續二生有
 相續三分位相續四法相續五刹那相續中有相續
 者謂死有蘊滅中有蘊生死有諸蘊由中有諸蘊說
 名相續故名中有相續生有相續者謂中有蘊滅生
 有蘊生中有諸蘊由生有諸蘊說名相續故名生有
 相續分位相續者謂羯邏藍分位滅頰部曇分位生
 獶邏藍分位由頰部曇分位說名相續乃至壯年分
 位滅老年分位生壯年分位由老年分位說名相續
 故名分位相續法相續者謂善法無間染惑無記法
 現在前善法由染及無記法說名相續染法無記法

無間各二現前廣說亦爾故名法相續刹那相續者
 前刹那無間後刹那現在前前刹那由後刹那說名
 相續故名刹那相續此五相續皆攝二相續中謂法
 相續刹那相續以中有生有分位相續皆名爲法及
 刹那故欲界具五相續色界有四除分位無色界有
 三除中有及分位大那落迦及化生有四相續除分
 位餘皆具五有說天及化生亦具五相續於五相續
 中此中依二相續而作論謂中有生有諸捨欲有欲
 有相續彼一切欲界法滅欲界法現在前耶答諸捨
 欲有欲有相續彼一切欲界法滅欲界法現在前謂

欲界命終還生欲界從死有往中有時捨欲有者謂欲界死有欲有相續者謂欲界中有欲界法滅者謂欲界死有諸蘊欲界法現在前者謂欲界中有諸蘊若從中有往生有時捨欲有者謂欲界中有欲有相續者謂欲界生有欲界法滅者謂欲界中有諸蘊欲界法現在前者謂欲界生有諸蘊問若住欲界無覆無記心命終者住中有時不成就死有住生有時不成就中有可名爲捨若住善惑染心而命終者住中有时成就死有住生有時成就中有云何名捨有說此中但依住無覆無記心命終者說是故無過有說

此中依現行捨說雖住中有成就死有住生有成就中有而不現行故說爲捨有說此中棄背前蘊說名爲捨不說成就就不成就義有欲界法滅欲界法現在前而非捨欲有欲有相續謂不命終而欲界法滅欲界法現在前其事云何謂羯邏藍位無間頰部曇位現在前乃至壯年位無間老年位現在前善法無間染惑無記法現在前染法無間善惑無記法現在前無記法無間善及染法現在前前刹那無間後刹那法現在前耶答諸捨欲有色有相續彼一切欲界法無間現在前諸捨欲有色有相續彼一切欲界法滅色界

論

大般涅槃經卷一百一十一

十一

序二

滅色界法現在前謂欲界命終生色界從死有往中
有時捨欲有者謂欲界死有色有相續者謂色界中
有欲界法滅者謂欲界死有諸蘊色界法現在前者
謂色界中有諸蘊有欲界法滅色界法現在前而非
捨欲有色有相續謂不命終欲界法滅色界法現在
前其事云何此中有說欲界善心無間未至定現在
前有說欲界善心無間未至定初靜慮現在前有說
欲界善心無間未至定初靜慮靜慮中間現在前尊
者妙音說曰欲界善心無間未至定初靜慮靜慮中
間第二靜慮現在前所以者何如超定時初靜慮無

問第三靜慮現在前此亦應爾又欲界有四種變化
心謂初靜慮果乃至第四靜慮果欲界初靜慮果變
化心無間淨初靜慮現在前乃至欲界第四靜慮果
變化心無間淨第四靜慮現在前諸捨欲有無色有
相續彼一切欲界法滅無色界法現在前耶答如是
設欲界法滅無色界法現在前彼一切捨欲有無色
有相續耶答如是問此中何故不說不命終欲界法
滅無色界法現在前耶答理必無有在無色界不命
終而有欲界法滅無色界法現在前故問豈不容有
在欲界不命終而欲界得滅無色界得現在前耶答

1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

此中說同類法滅同類法現在前無有在欲界不命終而欲界同類法得滅無色界同類法得而現在前是以不說有說此中說心心所法滅心心所法現在前無有在欲界不命終而欲界心心所法滅無色界心心所法現在前是故不說諸捨色有色有相續彼一切色界法滅色界法現在前耶答諸捨色有色有相續彼一切色界法滅色界法現在前謂色界命終還生色界從死有往中有時捨色有者謂色界死有色有相續者謂色界中有色界法滅者謂色界死有諸蘊色界法現在前者謂色界中有諸蘊從中有往

生有時捨色有者謂色界中有色有相續者謂色界生有色界法滅者謂色界中有諸蘊色界法現在前者謂色界生有諸蘊此中若住無覆無記心命終及住善心惑染心命終時皆名捨色有問答分別如前應知有色界法滅色界法現在前而非捨色有色有相續謂不命終色界法滅色界法現在前其事云何謂初靜慮無間第二第三靜慮現在前第二靜慮無間初第三第四靜慮現在前第三靜慮無間初第二第四靜慮現在前第四靜慮無間第二第三靜慮現在前善法無間染惑無記法現在前染法無記法說

亦爾前刹那無間後刹那現在前諸捨色有欲有相續彼一切色界法滅欲界法現在前耶答諸捨色有欲有相續彼一切色界法滅欲界法現在前謂色界命終生欲界從死有往中有時捨色有者謂色界死有欲有相續者謂欲界中有色界法滅者謂色界死有諸蘊欲界法現前者謂欲界中有諸蘊有色界法滅欲界法現在前而非捨色有欲有相續謂不命終而色界法滅欲界法現在前其事云何此中有說未至定無間欲界善心現在前有說未至定初靜慮無間欲界善心現在前有說未至定初靜慮靜慮中間

無間欲界善心現在前尊者妙音說曰未至定初靜慮靜慮中間第二靜慮無間欲界善心現在前所以者何如超定時第三靜慮無間初靜慮現在前此亦應爾又欲界有四種變化心謂初靜慮果乃至第四靜慮果淨初靜慮無間欲界初靜慮果變化心現在前乃至淨第四靜慮無間欲界第四靜慮果變化心現在前諸捨色有無色有相續彼一切色界法滅無色界法現在前耶答諸捨色有無色有相續彼一切色界法滅無色界法現在前謂色界命終生無色界從死有往生有時捨色有者謂色界死有無色有相

續者謂無色界生有色界法滅者謂色界死有諸蘊無色界法現在前者謂無色界生有諸蘊有色界法減無色界法現在前而非捨色有無色有相續謂不命終色界法減無色界法現在前其事云何謂第三靜慮無間空無邊處現在前第四靜慮無間空識無邊處現在前諸捨無色有無色有相續彼一切無色界法減無色界法現在前耶答諸捨無色有無色有相續彼一切無色界法減無色界法現在前謂無色界命終還生無色界從死有至生有時捨無色有者謂無色界死有無色有相續者謂無色界生有無色

界法滅者謂無色界死有諸蘊無色界法現在前者謂無色界生有諸蘊有無色界法減無色界法現在前而非捨無色有無色有相續謂不命終無色界法減無色界法現在前其事云何謂空無邊處無間識無邊處無所有處現在前識無邊處無間空無邊處無所有處非想非非想處現在前無所有處無間識無邊處非想非非想處現在前非想非非想處無間識無邊處無所有處現在前善法無間染惑無記法現在前染法無記法說亦爾前剎那無間後剎那現在前諸捨無色有欲有相續彼一切無色界法滅

論

大般若經卷二十一

廿

序二

欲界法現在前耶答如是設無色界法滅欲界法現在前彼一切捨無色有欲有相續耶答如是問此中何故不說不命終無色界法滅欲界法現在前耶答理必無有在無色界不命終而有無色界法滅欲界法現在前故餘問答如前諸捨無色有色有相續彼一切無色界法滅色界法現在前耶答諸捨無色有色有相續彼一切無色界法滅色界法現在前謂無色界命終生色界從死有往中有時捨無色有者謂無色界死有色有相續者謂色界中有無色界法滅者謂無色界死有諸蘊色界法現在前者謂色界中

有諸蘊有無色界法滅色界法現在前而非捨無色有色有相續謂不命終而無色界法滅色界法現在前其事云何謂識無邊處無間第四靜慮現在前空無邊處無間第三第四靜慮現在前具隨本文分別義已當隨其義復廣分別問若欲界命終還生欲界彼何所捨何所得何法滅何法現在前乃至若無色界命終生色界彼何所捨何所得何法滅何法現在前答諸欲界命終還生欲界若本住別解脫律儀無不善身語表設有已失者若住善心命終彼捨善蘊二無記蘊二得無記蘊二卽於彼時善五蘊染一蘊

論

卷之二十一

十一

十一

無記二蘊滅善一蘊染四蘊無記二蘊現在前若住
染心命終彼捨善蘊二無記蘊二得無記蘊二卽於
彼時善二蘊染四蘊無記二蘊滅善一蘊染四蘊無
記二蘊現在前若住無記心命終彼捨善蘊二無記
蘊五得無記蘊二卽於彼時善二蘊滅善一蘊染一蘊無記五
蘊滅善一蘊染四蘊無記二蘊現在前卽彼若有不
善身語表不失者若住善心命終彼捨善蘊二染蘊
二無記蘊二得無記蘊二卽於彼時善五蘊染二蘊
無記二蘊滅善一蘊染四蘊無記二蘊現在前若住
染心命終彼捨善蘊二染蘊二無記蘊二得無記蘊
二卽於彼時善二蘊染五蘊無記二蘊滅善一蘊染
四蘊無記二蘊現在前若住無記心命終彼捨善蘊
二染蘊二無記蘊五得無記蘊二卽於彼時善一蘊
染二蘊無記五蘊滅善一蘊染四蘊無記二蘊現在
前若本住不律儀無善身語表設有已失者若住善
心命終彼捨染蘊二無記蘊二得無記蘊二卽於彼
時善四蘊染二蘊無記二蘊滅善一蘊染四蘊無記
二蘊現在前若住染心命終彼捨染蘊二無記蘊二
得無記蘊二卽於彼時善一蘊染五蘊無記二蘊滅
善一蘊染四蘊無記二蘊現在前若住無記心命終

彼捨染蘊二無記蘊五得無記蘊二卽於彼時善一
 蘊染一蘊無記五蘊滅善一蘊染四蘊無記一蘊現
 在前卽彼若有善身語表不失者若住善心命終等
 廣如住別解脫律儀有不善身語表設若本住非律
 儀非不律儀無善不善身語表設有已失者若住善
 心命終彼捨無記蘊二得無記蘊二卽於彼時善四
 蘊染一蘊無記二蘊滅善一蘊染四蘊無記二蘊現
 在前若住染心命終被捨無記蘊而得無記蘊二卽
 於彼時善一蘊染四蘊無記二蘊滅善一蘊染四蘊
 無記二蘊現在前若住無記心命終彼捨無記蘊五
 得無記蘊二卽於彼時善一蘊染一蘊無記五蘊滅
 善一蘊染四蘊無記二蘊現在前卽彼若有善身語
 表不失無不善身語表設有已失者若住善染無記
 心命終如住別解脫律儀無不善身語表設有已失
 者住三種心命終說卽彼若有不善身語表不失無
 善身語表設有已失者若住善染無記心命終如住
 不律儀無善身語表設有已失者住三種心命終說
 卽彼若有善不善身語表不失者若住善染無記心
 命終如住別解脫律儀有不善身語表不失者及住
 不律儀有善身語表不失者住三種心命終說

論

阿毗達磨大毗婆沙論卷第一百九十二

阿毗達磨大毗婆沙論卷第一百九十二

說一切有部發智

校讎

第十八紙十四行南藏

說若君

音釋

阿泥律陀

梵語也此云無滅卽阿那律陀也

覲

初觀

切

坌

蒲闊

切

窶

瑜

切

窶

也

此云

此云

羣羽羯邏藍

梵語也此云凝滑渴居謁切

頰

部

曇

梵語也

阿葛

切

頰

阿葛

切

頰

阿葛

切

阿葛

曇徒舍

浮渡

呂士吳用先施貨刻此

計

一百九十二卷

計

一百九十二卷

計

一百九十二卷

計

一百九十二卷

計

一百九十二卷

一百九十二卷

一百九十二卷

一百九十二卷

阿毗達磨大毗婆沙論卷第一百九十三

五百大阿羅漢等造

唐三藏法師玄奘奉詔譯

見蘊第八中三有納息第二之二

諸欲界命終生初靜慮若本住別解脫律儀或不住別解脫律儀有善身語表不失者若住善心命終彼舍善蘊五無記蘊二有說五得善蘊四無記蘊二卽六彼時善五蘊染一蘊無記二蘊滅善一蘊染四蘊亦記二蘊現在前若住無記心命終彼捨善蘊五無記蘊五得善蘊四無記蘊二卽於彼時善二蘊染一

論語卷一百一十一

論三

蘊無記五蘊滅善一蘊染四蘊無記二蘊現在前若本不住別解脫律儀無善身語表設有已失者若住善心命終彼捨善蘊四無記蘊二有說五得善蘊四無記蘊二卽於彼時善四蘊染一蘊無記二蘊滅善一蘊染四蘊無記二蘊現在前若住無記心命終彼捨善蘊四無記蘊五得善蘊四無記蘊二卽於彼時善一蘊染一蘊無記五蘊滅善一蘊染四蘊無記二蘊現在前諸欲界命終生第二第三第四靜慮若本住別解脫律儀或不住別解脫律儀有善身語表不失者若住善心命終彼捨善蘊五無記蘊五得善蘊

四無記蘊二卽於彼時善五蘊染一蘊無記二蘊滅善一蘊染四蘊無記二蘊現在前若住無記心命終彼捨善蘊五無記蘊五得善蘊四無記蘊二卽於彼時善二蘊染一蘊無記五蘊滅善一蘊染四蘊無記二蘊現在前若本不住別解脫律儀無善身語表設有已失者若住善心命終彼捨善蘊五無記蘊五得善蘊四無記蘊二卽於彼時善四蘊染一蘊無記五蘊滅善一蘊染四蘊

無記二蘊現在前諸欲界命終生無色界若本住別
解脫律儀或不住別解脫律儀有善身語表不失者
若住善心命終彼捨善蘊五無記蘊五得善蘊四無
記蘊一卽於彼時善五蘊染一蘊無記二蘊滅善一
蘊染四蘊無記一蘊現在前若住無記心命終彼捨
善蘊五無記蘊五得善蘊四無記蘊一卽於彼時善
二蘊染一蘊無記五蘊滅善一蘊染四蘊無記一蘊
現在前若本不住別解脫律儀無善身語表設有已
失者若住善心命終彼捨善蘊五無記蘊五得善蘊
四無記蘊一卽於彼時善四蘊染一蘊無記二蘊滅
善一蘊染四蘊無記一蘊現在前若住無記心命終
彼捨善蘊五無記蘊一蘆染四蘊無記蘊二得無記蘊
一蘊現在前諸色界命終還生色界卽此地歿還生
此地者若住善心命終彼捨無記蘊二得無記蘊二
卽於彼時善四蘊染一蘊無記二蘊滅善一蘊染四
蘊無記二蘊現在前若住染心命終彼捨無記蘊二
得無記蘊二卽於彼時善一蘊染四蘊無記二蘊滅
善一蘊染四蘊無記二蘊現在前若住無記心命終
彼捨無記蘊五得無記蘊二卽於彼時善一蘊染一

論
大般若經卷一百一十三
釋三

三

釋三

蘊無記五蘊滅善一蘊染四蘊無記二蘊現在前色界下地歿生上地者若住善心命終彼捨善蘊五無記蘊五得善蘊四無記蘊二卽於彼時善四蘊染一蘊無記二蘊滅善一蘊染四蘊無記二蘊現在前若住無記心命終彼捨善蘊五無記蘊五得善蘊四無記蘊二卽於彼時善一蘊染一蘊無記五蘊滅善一蘊染四蘊無記二蘊現在前色界下地歿生下地者若住善心命終彼捨善蘊五無記蘊五得善蘊五染蘊四無記蘊五卽於彼時善四蘊染一蘊無記二蘊現在前若住染心命終滅善一蘊染四蘊無記二蘊現在前若住染心命終彼捨善蘊五無記蘊五得善蘊五染蘊四無記蘊五卽於彼時善一蘊染四蘊無記二蘊滅善一蘊染四蘊無記蘊五得善蘊五染蘊四無記蘊五卽於彼時善一蘊染一蘊無記五蘊滅善一蘊染四蘊無記二蘊現在前若住染心命終彼捨善蘊五無記蘊五得善蘊四染蘊四無記蘊二有說五卽於五卽於彼時善四蘊染一蘊無記二蘊滅善一蘊染四蘊無記二蘊現在前若住染心命終彼捨善蘊五無記蘊五得善蘊四染蘊四無記蘊二有說五卽於

論
大般涅槃經卷第十三

四

序三

彼時善一蘊染四蘊無記二蘊滅善一蘊染四蘊無記二蘊現在前若住無記心命終彼捨善蘊五無記蘊五得善蘊四染蘊四無記蘊二有說五卽於彼時善一蘊染一蘊無記五蘊滅善一蘊染四蘊無記二蘊現在前諸色界命終生無色界若住善心命終彼捨善蘊五無記蘊五得善蘊四無記蘊一卽於彼時善四蘊染一蘊無記二蘊滅善一蘊染四蘊無記一蘊現在前若住無記心命終彼捨善蘊五無記蘊五得善蘊四無記蘊一卽於彼時善一蘊染一蘊無記五蘊滅善一蘊染四蘊無記一蘊現在前若住無記心命終彼捨無記蘊一卽於彼得善一蘊染四蘊無記一蘊滅善一蘊染四蘊無記一蘊現在前若住無記心命終彼捨無記蘊四得無記蘊一卽於彼時善一蘊染一蘊無記四蘊滅善一蘊染四蘊無記一卽於彼時善四蘊染一蘊無記一蘊滅善者若住善心命終彼捨善蘊四無記蘊一得善蘊四無記蘊一卽於彼時善四蘊染一蘊無記一蘊滅善

1 2 3 4 5 6 7 8 9 10 1 2 3 4 5 6 7 8 9 80 1 2 3 4 5 6 7 8 9

一蘊染四蘊無記一蘊現在前若住無記心命終彼捨善蘊四無記蘊四得善蘊四無記蘊一卽於彼時善一蘊染一蘊無記四蘊滅善一蘊染四蘊無記一蘊現在前無色界上地歿生下地者若住善心命終彼捨善蘊四無記蘊一得善蘊四染蘊四無記蘊一蘊無記一蘊現在前若住染心命終彼捨善蘊四無記蘊無記一蘊染四蘊無記一蘊滅善一蘊染四蘊無記一蘊現在前若住染心命終彼捨善蘊四無記蘊一蘊染四蘊無記一蘊滅善一蘊染四蘊無記一蘊現前若住無記心命終彼捨善蘊四無記蘊四得善蘊四染蘊四無記蘊一蘊滅善一蘊染一蘊無記四蘊滅善一蘊染四蘊無記一蘊現在前諸無色界命終生欲界者若住善心命終彼捨善蘊四無記蘊一得善蘊四染蘊四無記蘊二有說五卽於彼時善四蘊染一蘊無記一蘊滅善一蘊染四蘊無記二蘊現在前若住染心命終彼捨善蘊四無記蘊一得善蘊四染蘊四無記蘊二有說五卽於彼時善一蘊染四蘊無記一蘊滅善一蘊染四蘊無記二蘊現在前若住無記心命終彼捨善蘊四無記蘊四得善蘊四染蘊四無記蘊二有說五卽於彼時善一蘊染一

論 七
方圓身說卷一百九十三

六

序三

蘊無記四蘊滅善一蘊染四蘊無記二蘊現在前諸無色界命終生色界者若住善心命終彼捨善蘊四無記蘊一得善蘊五染蘊四無記蘊五卽於彼時善四蘊染一蘊無記一蘊滅善一蘊染四蘊無記二蘊現在前若住染心命終彼捨善蘊四無記蘊一得善蘊五染蘊四無記蘊五卽於彼時善一蘊染四蘊無記一蘊滅善一蘊染四蘊無記二蘊現在前若住無記心命終彼捨善蘊四無記蘊四得善蘊五染蘊四無記蘊五卽於彼時善一蘊染一蘊無記四蘊滅善一蘊染四蘊無記二蘊現在前何故欲界隨眠不於

色界法隨增耶乃至廣說問何故作此論答欲令疑者得決定故謂前結蘊有情納息中說欲界異生有九十八隨眠隨增九結繫色界異生有六十二隨眠隨增六結繫或有生疑欲界異生爲色無色界隨眠隨增色界異生爲無色界隨眠隨增欲令此疑得決定故顯成就彼非彼隨增謂欲界異生但爲欲界隨眠隨增非色無色界色界異生但爲色界隨眠隨增非無色界由此因緣故作斯論何故欲界隨眠不於色界法隨增耶答界應雜亂及不可施設離欲染故界雜亂者

方助學分題第二卷第十三

七

摩三

謂彼亦是欲界亦是色界則不可說欲色界異及不可施設離欲染者謂離欲界貪時不名離欲界染離色界貪時乃名離欲界染此不應理何故欲界隨眠不於無色界法隨增耶答界應雜亂及不可施設離欲染故界雜亂者謂彼亦是欲界亦是無色界則不可說欲無色界異及不可施設離欲染者謂離欲界貪時不名離欲界染離無色界貪時乃名離欲界染此不應理何故色界隨眠不於欲界法隨增耶答界應雜亂及彼非此所緣故界雜亂者謂彼亦是色界亦是欲界則不可說色欲界異及彼非此所緣故者

謂無上地煩惱緣下地法故何故色界隨眠不於無色界法隨增耶答界應雜亂及不可施設離色染故界雜亂者謂彼亦是色界亦是無色界則不可說色無色界異及不可施設離色染者謂離色界貪時不名離色界染離無色界貪時乃名離色界染此不應理何故無色界隨眠不於欲界法隨增耶答界應雜亂及彼非此所緣故何故無色界隨眠不於色界法隨增耶答界應雜亂及彼非此所緣故皆如前應知問所說三界云何建立爲以地爲以處爲以愛斷耶設爾何失若以地者應說九界地有九故謂欲界四

60

1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

論

大藏經卷第廿九

八

序三

靜慮四無色若以處者應說四十界有四十處故謂欲界二十處色界十六處無色界四處若以愛斷者亦應說九界謂欲界愛乃至非想非非想處愛各分齊有異故答應說以愛斷故建立三界問若爾應立九界答同類愛斷故惟立三界謂從無間地獄乃至他化自在天皆由欲愛所差別故建立欲界從梵衆天乃至色究竟天皆由色愛所差別故建立色界從空無邊處乃至非想非非想處皆由無色愛所差別故建立無色界復次若處有色有欲立欲界有色無欲立色界無色無欲立無色界復次若處有色有第

二立欲界有色無第二立色界無色無第二立無色界復次若處有色有境立欲界有色無境立色界無色無境立無色界復次若處有色有衆具立欲界有色無衆具立色界無色無衆具立無色界復次若處有色有欲有我執立欲界有色無欲有我執立色界無色無欲有我執立無色界復次若處有色有第二有我執立欲界有色無第二有我執立色界無色無第二有我執立無色界境及衆具說亦爾復次若處有色無慚無愧相應立欲界有色無慚無愧不相應立色界無色無慚無愧不相應立無色界復次若處

論

大藏經卷第廿九

九

序三

有色慳嫉相應立欲界有色慳嫉不相應立色界無色慳嫉不相應立無色界復次若處有色憂苦根相應立欲界有色憂苦根不相應立色界無色憂苦根不相應立無色界復次若處有色段食姪愛不相應立色界無色段食姪愛相應立欲界有色段食姪愛不相應立無色界復次若處有五蘊異熟因五蘊異熟果不善無記隨眠隨增立欲界有五蘊異熟因五蘊異熟果惟無記隨眠隨增立色界有四蘊異熟因四蘊異熟果惟無記隨眠隨增立無色界復次若處有四蘊異熟因得一果不善無記隨眠隨增立欲界

有五蘊異熟因得一果惟無記隨眠隨增立色界有四蘊異熟因得一果惟無記隨眠隨增立無色界復次若處有三受異熟因三受異熟果不善無記隨眠隨增立欲界有二受異熟因二受異熟果惟無記隨眠隨增立色界有一受異熟因一受異熟果惟無記隨眠隨增立無色界復次若處有四受異熟因四受異熟果不善無記隨眠隨增立欲界有三受異熟因三受異熟果惟無記隨眠隨增立色界有一受異熟因一受異熟果惟無記隨眠隨增立無色界復次若處有有色無色異熟因有色無色異熟果不善無記

隨眠隨增立欲界有有色無色異熟因有色無色異熟果惟無記隨眠隨增立色界有無色異熟因無色異熟果惟無記隨眠隨增立無色界如有色無色如是有見無見有對無對說亦爾問所說三界云何安立爲上下重累爲隣次傍布若上下者云何施設徧離彼染云何神通能徧至彼若傍布者陀羅達多所說當云何通如說下方世界無邊上方世界無邊此中有說上下重累謂從此界風輪之下虛空懸遠有下方色究竟天彼下展轉乃至風輪次下復有色究竟天展轉向下乃至風輪如是展轉下方世界乃至無邊又從此界色究竟上虛空懸遠有上方風輪彼上展轉乃至色究竟天次上復有風輪展轉向上乃至色究竟天如是展轉上方世界乃至無邊問若爾云何施設徧離彼染云何神通能徧至彼答若有離一欲界染時卽名離一切欲界染以相同故然依初定所發神通但能至一欲界梵世非餘以處別故如是離色界染及依餘定發通隨應亦爾有餘師說隣次傍布問若爾陀羅達多所說當云何通答彼應作是說下方欲界無邊上方色界無邊此中欲界諸處同一隨眠色界隨地差別各別隨眠問何故欲

論

大藏經卷一百九十一

十一

釋三

界諸處同一隨眠色無色界隨地各別答欲界是不定界非修地非離染地此中煩惱如無轡馬自在奔逸故一切處同一隨眠色無色界是定界是修地是離染地此中煩惱如有轡馬不自在轉故上下地各別隨眠復次欲界不善根強盛善根羸劣故一切處同一隨眠色無色界無不善根善根強盛故上下地各別隨眠復次欲界不善增長善法退減色無色界無不善法善法增長復次欲界不善如主善法如客色無色界無不善法善法如主復次欲界有不善根能斷善根色無色界無不善根能斷善根復次欲界禮儀無忌猶如夫妻故一切處同一隨眠色無色界禮儀有隔猶如母子故上下地各別隨眠復次欲界善法威儀有雜猶如王子與旃荼羅子同禁固固故一切處同一隨眠色無色界善法威儀無雜猶如王子與長者子同禁固固故上下地各別隨眠問三界中間有物間不若有者彼有二物界應成五卽五中間復有四物界應成九如是展轉便爲無窮若無者云何不三界合成一耶答應言彼中更無物間問若爾三界云何不成一耶答於彼中間雖無物間而成一如十八界十二處五蘊三世四大種等雖無物

論

大藏經卷一百九十一

十一

釋三

論
大藏經卷一百一十一
十一
十一

十一
十一

間而不成一此亦如是復次性相異故物類別故雖無物間而不成一問若爾他化自在天上初靜慮下中間懸遠有無量空界色云何可知此是欲界此是色界分齊差別耶答二界輪際俱有光網二光分齊麤妙不等由此了知此是欲界此是色界復次若欲界生得天眼所能見處是欲界不能見處是色界復次若欲界神通所能到處是欲界不能到處是色界復次若處欲界愛所緣是欲界色界愛所緣是色界是謂二界分齊差別何故欲界不偏行隨眠不偏於欲界法隨增耶答此應成偏行及彼非此所緣故此應成偏行者謂此欲界不偏行隨眠若偏於欲界法隨增者亦應成偏行則不可施設偏行隨眠不偏行隨眠相用差別及彼非此所緣故者謂彼異部諸法非此不偏行隨眠所緣此但以自部法爲所緣故所以者何由不偏行隨眠勢力建立五部諸法有異若不偏行隨眠亦偏緣五部者則於五部應偏隨增如是便爲五部雜亂五部雜亂故則對治雜亂對治雜亂故則現觀雜亂現觀雜亂故則不可施設偏知差別沙門果差別欲令無如是過是故欲界不偏行隨眠不偏於欲界法隨增何故色界不偏行隨眠

論語 十一
方正義注解卷一百九十三

十一

十一

不徧於色界法隨增耶答此應成徧行及彼非此所緣故何故無色界不徧行隨眠不徧於無色界法隨增耶答此應成徧行及彼非此所緣故皆如前釋徧行因義廣說如雜蘊智納息及結蘊不善納息有十想謂無常想乃至滅想此如定蘊攝納息中已廣分別若修無常想彼思惟無常想耶乃至廣說修有四種謂得修習修對治修除遣修四修義如智蘊他心智納息中廣說此中有說但依習修作論有說通依得修習修作論諸有欲令此中但依習修作論者彼說若修無常想者謂無常想現在前彼思惟無常想者謂以無常想爲所緣即是無常想現在前時緣無常想義若修無常想彼思惟無常想耶答應作四句有修無常想不思惟無常想謂緣餘法修無常想如緣色受行識蘊除無常想緣餘想蘊起無常想問此說在何位答在增長煖頂位起無常行相身受心念住及緣餘法法念住若離欲界乃至非想非非想處染起無常行相身受心念住及緣餘法法念住爲加行彼加行道時若信勝解練根作見至時解脫練根作不動起無常行相身受心念住及緣餘法法念住爲加行彼加行道時若起無常行相身受心念住及

論

大般涅槃經卷第十一

十一

序三

緣餘法法念住時若卽以此類念住雜修靜慮時諸
有欲令一切法是勝義者卽起此類念住義無礙解
時及起此類念住辯無礙解願智邊際定無色解脫
入滅盡定想微細心時如是等時修無常想無常想
現在前故不思惟無常想緣餘法故有思惟無常想
不修無常想謂緣無常想修餘想餘想者謂無常苦
想苦無我想及餘善餘無記想此中善想者謂加行
善及生得善想加行善想謂聞思修所成聞所成者
謂緣無常想起非無常行相聞所成想思所成者謂
緣無常想起非無常行相思所成想修所成者謂緣

無常想起非無常行相問此修所成想說在何位答
在煖頂忍初及增長位緣無常想起非無常行相法
念住若世第一法位起三行相法念住若已入正性
離生苦現觀四心頃起三行相法念住集道現觀各
四心頃起四行相法念住若以緣無常想非無常行
相法念住離欲界乃至非想非非想處染若卽以此
爲加行彼一切加行無間解脫道時若以緣無常想
非無常行相法念住信勝解練根作見至時解脫練
根作不動若卽以此爲加行彼一切加行無間解脫
道時若以緣無常想非無常行相法念住雜修靜慮

論
卷之二
方正傳
第二
三

序
三

及起他心智宿住隨念智通時起緣無常想非無常行相法念住時起四無量時諸有欲令一切法是勝義者卽起此類法念住義無礙解時及起此類法念住辯無礙解願智邊際定無色解脫空識無邊處偏處入滅盡定想微細心時是名善想染想者謂緣無常想起薩迦耶見執我我所起邊執見執斷常起邪見執無因無作及損減起見取執上妙勝第一起戒禁取執淨解脫出離起疑猶豫不決起無明無智黑暗愚癡起貪愛樂悅意起瞋不愛樂不悅意起慢高舉如是等時是名染想無記想者謂緣無常想起非如理非不如理想是名思惟無常想緣無常想故不修無常想起餘想故有修無常想亦思惟無常想謂緣無常想修無常想如無常想長時相續現在前時緣自相續過去未來及他相續三世無常想問此說在何位答在煩頂忍初及增長位緣無常想起無常行相法念住若世第一法位起無常行相法念住若已入正性離生苦現觀四心頃起無常行相法念住若以緣無常想無常行相法念住離欲界乃至非想非非想處染若卽以此爲加行彼一切加行無間解脫道時若以此類法念住信勝解練根作見至時解

論

方正義

解

脫練根作不動若卽以此爲加行彼一切加行無間
 解脫道時若以此類法念住雜修靜慮及有欲令一
 切法是勝義者起義無礙解及起願智邊際定無色
 解脫入滅盡定想微細心時有說及起無願無願三
 摩地時如是等時修無常想無常想現在前故亦思
 惟無常想緣無常想故有不修無常想亦不思惟無
 常想謂除前想問此說在何位答在初煖頂忍及增
 長忍起緣滅諦法念住若增長煖頂不緣無常想起
 非無常行相諸念住時若已入正性離生滅現觀四
 心頃若於修位無學位中起一切不緣無常想非無

常行相諸念住時如是等時不修無常想無常想不
 現前故亦不思惟無常想不緣無常想故迦濕彌羅
 國外諸師作如是誦有不修無常想亦不思惟無常
 想謂緣餘法修餘想如緣色受行識蘊除無常想餘
 想蘊起餘想緣無爲起餘想餘想者謂無常苦想苦
 無我想及餘一切非無常想廣說應知如無常想無
 常苦想苦無我想亦爾差別者說自名及第三句中
 皆除無願無願不淨想厭食想一切世間不可樂想
 死想斷想離想滅想隨應當知者謂若修不淨想彼
 不思惟不淨想以不淨想現在前時緣顯形色故若

思惟不淨想彼不修不淨想以緣不淨想時餘想現在前故餘想者謂無常想無常苦想苦無我想及餘死想斷想離想滅想亦爾差別者說自所緣謂若修獸食想彼不思惟獸食想以彼想現在前時緣香味觸故若思惟獸食想彼不修獸食想以緣彼想時餘想現在前故餘想者如前說若修一切世間不可樂想彼不思惟一切世間不可樂想以一切世間不可樂想現在前時緣諸世間可愛事故若思惟一切世間不可樂想彼不修一切世間不可樂想以緣彼世間不可樂想時餘想現在前故餘想者如前說若修死想彼不思惟死想以死想現在前時緣命根及命根俱生無常性故若思惟死想彼不修死想以緣彼死想時餘想現在前故餘想者如前說若修斷想彼不思惟斷想以斷想現在前時緣涅槃故若思惟斷想彼不修斷想以緣彼斷想時餘想現在前故餘想者如前說如斷想離想滅想亦爾

者如前說如斷想離想滅想亦爾
阿毗達磨大毗婆沙論卷第一百

阿毗達磨大毗婆沙論卷第一百九十三

說一切有
一部發智

第十紙

六行
四受南藏受第十二紙

二十九

南藏界三第

説

大藏書卷一百九十四

釋

十四紙

五行相身受心

南藏

想身受思

第十五紙

三行第一

法位

南藏

念住

第一法

音釋

蘊

糾問切

分齊

分扶問切齊在計計分齊限量也計彼義切計馬韻也計因郎丁切固魚固力彥切固名練精練也計馬韻也計彼義切計桐城弟子趙士先施貲刻此計阿毗達磨大毗婆沙論第一百九十三卷計一百九十三卷計一百九十三卷計一百九十三卷計一百九十三卷計一百九十三卷計阿毗達磨大毗婆沙論第一百九十三卷一百九十三卷一百九十三卷一百九十三卷一百九十三卷一百九十三卷一百九十三卷一百九十三卷一百九十三卷一百九十三卷一百九十三卷

阿毗達磨大毗婆沙論卷第一百九十四

五百大阿羅漢等造

唐三藏法師玄奘奉詔譯

見蘊第八中三有納息第二之三

諸有欲令此中通依得修習修作論者彼說若修無常想者謂無常想若現前若不現前而修彼思惟無常想義若修無常想彼思惟無常想耶答應作四句有修無常想不思惟無常想謂緣餘法修無常想如綠色受行識蘊除無常想餘想蘊修無常想緣無爲

修無常想問此說在何位答此說在增長煖頂位起身受心念住及緣餘法法念住若初頂忍及增長忍起緣滅諦法念住若以滅智離欲界乃至無所有處染以身受心念住及緣餘法法念住爲加行彼一切加行無間解脫道時離非想非非想處染說亦爾惟除第九解脫道時若以緣滅諦法念住信勝解練根作見至若以身受心念住及緣餘法法念住爲加行彼加行無間解脫道時無學練根說亦爾惟除第九解脫道若以身受心念住及緣餘法法念住雜修靜慮時若引發神境天眼天耳通時若以受心念住及緣餘法法念住起他心智通時若起不淨觀持息念初三解脫八勝處前八徧處法詞二無礙解時起無諍空空無願無願無相無相時有說除起無願無願時起身受心念住及緣餘法法念住時諸有欲令一切法是勝義者起身受心念住及緣餘法法念住義無礙解及有欲令惟涅槃是勝義者起義無礙解時起身受心念住及緣餘法法念住辯無礙解願智邊際定無色解脫入滅盡定想微細心時於如是時修無常想不思惟無常想有思惟無常想不修無常想謂緣無常想修餘想餘想者謂無常苦想苦無我想

論

方正義註解

卷四

釋四

及餘善染無記想此中善想者謂加行善及生得善
 想加行善想謂聞思修所成聞思所成如前說修所
 成者謂緣無常想起非無常行想修所成想而不修
 無常想問此說在何位答在初煖位緣集道諦時若
 已入正性離生集現觀四心頃道現觀三心頃若異
 生離欲界乃至無所有處染若以緣無常想法念住
 爲加行彼一切加行無間解脫道時卽異生引發緣
 無常想法念住他心智宿住隨念智通時卽異生起
 四無量及緣無常想法念住時卽異生起緣無常想
 法念住無色解脫及起空識無邊處偏處時是名善
 想染及無記想如前說是名思惟無常想不修無常
 想有修無常想亦思惟無常想謂緣無常想修無常
 想如無常想相續現在前時緣自相續過未及他相
 繼三世無常想問此說在何位答此說在初煖位起
 緣苦諦法念住增長煖頂起緣無常想法念住初頂
 忍及增長忍起緣三諦法念住若起世第一法若已
 入正性離生苦現觀四心頃及道類智時若以緣無常
 想法念住離欲界乃至非想非非想處染若卽以此爲
 加行彼一切加行無間解脫道時若以緣無常
 想法念住信勝解練根作見至時解脫練根作不動

論

大般涅槃經卷一百一十四

三

釋四

若卽以此爲加行彼一切加行無間解脫道時若以緣無常想法念住雜修靜慮時若起緣無常想他心智宿住隨念智通時起四無量時諸有欲令一切法是勝義者起緣無常想法義無礙解及辯無礙解願智邊際定無色解脫入滅盡定想微細心時起空識無邊處偏處時有說及起無願無願時於如是時修無常想亦思惟無常想有不修無常想亦不思惟無常想謂除前相問此說在何位答此說在初煖位起緣滅諦法念住時若已入正性離生滅現觀四心頃及餘一切不緣無常想亦不修無常想位如其所應盡

當知外國師誦亦如前應知如無常想無常苦想苦無我想亦爾差別者說自名及第三句中除有說無願無願不淨想飲食想一切世間不可樂想死想斷想離想滅想隨應當知者謂不淨想等亦應作四句而有差別謂若修不淨想彼思惟不淨想耶答應作四句有修不淨想彼不思惟不淨想謂緣餘法修不淨想問此說在何位答此說若以滅道智離欲界乃至第三靜慮染若以身受心念住及緣餘法法念住爲加行彼一切加行道最後解脫道時有說一切解脫道時若依有色定離第四靜慮乃至非想非非想

論

大藏經論卷一百一十四

四

解四

處染若以身受心念住及緣餘法法念住爲加行彼一切加行道時若生欲色界得阿羅漢果最後解脫道時若以滅道智信勝解練根作見至以身受心念住及緣餘法法念住爲加行彼加行道時解脫道不定如前說時解脫練根作不動若依有色定以身受心念住及緣餘法法念住爲加行彼加行道及最後解脫道時若以身受心念住及緣餘法法念住雜修靜慮時若引發神境天眼天耳他心智通四無間道一解脫道及緣餘法他心智通解脫道時若起不淨觀持息念初三解脫八勝處前八徧處法詞二無礙解時若依有色定起身受心念住及緣餘法法念住時諸有欲令一切法是勝義者依有色定起身受心念住及緣餘法法念住義無礙解時及有欲令惟涅槃是勝義者起義無礙解時若依有色定起辯無礙解及起身受心念住及緣餘法法念住願智邊際定時若起無諍時若依有色定起空空無願無願無相無相時於如是時修不淨想不思惟不淨想有思惟不淨想不修不淨想謂緣不淨想修餘想餘想者謂無常想無常苦想苦無我想及餘善染無記想此中善想者謂加行善及生得善想加行善想謂聞思修

論

大藏經論卷一百一十四

五

解四

所成聞所成者謂緣不淨想起聞所成想思所成者謂緣不淨想起思所成想修所成者謂緣不淨想起修所成想而不修不淨想問此說在何位答此說在初煖頂忍及增長忍位緣苦集諦增長煖頂起緣不淨想法念住若起世第一法若已入正性離生苦集現觀各四心頃若以世俗道或苦集智離欲界乃至第三靜慮染一切九無間道八解脫道時有說惟無間道時若以世俗道離第四靜慮染以空無邊處近分緣不淨想法念住爲加行彼一切加行無間道時若以苦集智離第四靜慮染九無間道九解脫道時

若以苦集智信勝解練根作見至彼無間道時解脫道不定如前說若依空無邊處近分起緣不淨想法念住時是名善想染及無記想如前說差別者緣不淨想於如是時思惟不淨想不修不淨想有修不淨想亦思惟不淨想謂緣不淨想修不淨想問此說在何位答此說若以世俗道或苦集智離欲界乃至第三靜慮染以緣不淨想法念住爲加行彼一切加行道最後解脫道時有說及一切解脫道時若依有色定離第四靜慮乃至非想非非想處染若卽依此以緣不淨想法念住爲加行彼一切加行道時若以緣

論

大般若經卷一百四

麻四

苦集諦法念住信勝解練根作見至以緣不淨想法
 念住爲加行彼加行道時解脫道不定如前說若依
 有色定時解脫練根作不動以緣不淨想法念住爲
 加行彼加行道時若以緣不淨想法念住雜修靜慮
 時若起緣不淨想他心智通時若起宿住隨念智通
 時若起四無量時若依有色定起緣不淨想法念住
 時諸有欲令一切法是勝義者依有色定起緣不淨
 想義無礙解時若起緣不淨想願智邊際定時於如
 是時修不淨想亦思惟不淨想有不修不淨想亦不
 思惟不淨想謂除前想問此說在何位答此說初煖

頂忍及增長忍起緣滅道諦法念住若增長煖頂起
 身受心念住及緣餘法法念住若已入正性離生滅
 道現觀各四心頃若以滅道智離欲界乃至第三靜
 慮染彼一切九無間道八解脫道時有說惟無間道
 時若以滅道智離第四靜慮染九無間道九解脫道
 時若以世俗道離第四靜慮染卽依空無邊處近分
 以身受心念住及緣餘法法念住爲加行彼加行道
 九解脫道時若依有色定離空無邊處乃至非想非
 非想處染一切無間解脫道時惟除離非想非非想
 處染最後解脫道若依無色定離空無邊處染以身

論語 十二章 第二十一

卷四

受心念住及緣餘法法念住爲加行彼一切加行無間解脫道時若依無色定離上三無色染彼一切加行無間解脫道時惟除生欲色界離非想非非想染最後解脫道若以緣滅道諦法念住信勝解練根作見至無間道時解脫道不定如前說時解脫練根作不動若依無色以身受心念住及緣餘法法念住爲加行彼一切加行無間解脫道時惟除最後解脫道若起無色解脫後二徧住時若依無色起義無礙解辯無礙解空空無願無願無相無相及起入滅盡定想微

細心時善位如是若染汙及無記位不緣不淨想并一切無心位於如是時不修不淨想亦不思惟不淨想如不淨想貪食想乃至滅想亦爾皆作四句於中差別如理應思若起欲尋彼思惟欲尋耶答應作四句有起欲尋不思惟欲尋謂緣餘法起欲尋如緣色受想識蘊除欲尋餘行蘊起欲尋是名起欲尋不思惟欲尋緣餘法故有思惟欲尋不起欲尋謂緣欲尋起餘尋此有三種謂善緣無記善者謂加行善及生得善加行善中通聞思修所成聞所成者謂緣欲尋起聞所成思所成者謂緣欲尋起思所成修所成者

論語 十二章第十四

卷四

謂緣欲尋起修所成問此說在何位答此說初煖頂忍及增長忍起緣欲界法念住若增長煖頂起緣欲尋法念住若起世第一法若已入正性離生苦現觀二心頃謂苦法智忍苦法智集現觀二心頃謂集法智忍集法智若以苦集智離欲界染以緣欲尋法念住爲加行彼加行道九無間道九解脫道時若以世俗智離欲界染以緣欲尋法念住爲加行彼加行道九無間道時若依未至定爲離初靜慮乃至非想非非想處染以緣欲尋法念住爲加行彼一切加行道時乃至若依第四靜慮爲離第四靜慮乃至非想非非想處染以緣欲尋法念住爲加行彼一切加行道時乃至若依第四靜慮爲離第四靜慮乃至非想非

非想處染以緣欲尋法念住爲加行彼一切加行道時若以苦集法智信勝解練根作見至以緣欲尋法念住爲加行彼加行無間解脫道時若時解脫練根作不動若以緣欲尋法念住爲加行彼加行道時若以緣欲尋法念住雜修靜慮時起緣欲尋他心智通時起緣欲界宿住隨念智通時起四無量時起緣欲尋法念住義無礙解時若起緣欲尋法念住無諍願智邊際定時是名善染汙者謂緣欲尋起薩迦耶見執我我所廣說如前無記者謂緣欲尋起非如理非不

論

大藏經論卷一百一十一

九

廢四

如理作意於如是時思惟欲尋不起欲尋有起欲尋亦思惟欲尋謂緣欲尋起欲尋如欲尋長時相續現在前時緣自相續過未及他相續三世欲尋有不起欲尋亦不思惟欲尋謂除前相外方師誦謂緣餘法起餘尋此中如緣色受想識蘊除欲尋餘行蘊起餘尋緣無爲起諸尋及餘一切不起欲尋不思惟欲尋位如欲尋恚尋害尋亦爾差別者說自名若起出離尋彼思惟出離尋耶答應作四句有起出離尋不思惟出離尋謂緣餘法起出離尋如緣色受想識蘊除出離尋餘行蘊起出離尋緣無爲起出離尋問此說在何位答此說依未至初靜慮初煖頂忍及增長忍起緣滅諦法念住若增長煖頂起身受心念住及緣餘法法念住若已入正性離生滅現觀四心頃若依未至定以滅智離欲界及初靜慮染及依初靜慮以滅智離初靜慮染若以身受心念住及緣餘法法念住爲加行彼一切加行無間解脫道時卽依彼地以滅智信勝解練根作見至若以身受心念住及緣餘法法念住爲加行彼

論

大藏經卷一百一十四

摩四

加行無間解脫道時卽依彼地以苦集滅智時解脫
練根作不動若以身受心念住及緣餘法法念住爲
加行彼一切加行無間解脫道時若以身受心念住
及緣餘法法念住雜修初靜慮時若依初靜慮引發
神境天眼天耳他心智通四無間道一解脫道及緣
餘法他心智通解脫道時若依未至起持息念時若
依未至初靜慮起初二解脫前四勝處不淨觀身受
心念住及緣餘法法念住諸有欲令一切法是勝義
者起身受心念住及緣餘法法念住義無礙解及有
欲令惟涅槃是勝義者起義無礙解時卽依彼二地

起法無礙解詞無礙解若身受心念住及緣餘法法
念住辯無礙解時卽依彼二地起空空無願無願無
相無相時有說但起無相無相時於如是時起出離
尋不思惟出離尋緣餘法故有思惟出離尋不起出
離尋謂緣出離尋起餘尋此有三種謂善染無記善
者除思所成餘如前說於修所成中此說在何位答
此說依靜慮中間及上三靜慮初煥頂忍及增長忍
位起緣三諦法念住若增長煥頂位起緣出離尋法
念住若起世第一法若已入正性離生苦集道現觀
各四心頃若依靜慮中間以苦集道智離初靜慮染

論語

方正義論卷一百四十四

十一

十一

若卽以此及緣出離尋世俗法念住爲加行彼一切
 加行無間解脫道時卽依靜慮中間以道智離第二
 靜慮乃至非想非非想處染若卽以此及緣出離尋
 苦集智世俗法念住爲加行彼一切加行無間解脫
 道時惟除離有頂染最後解脫道若依第二靜慮近
 分離初靜慮染若卽以此以緣出離尋法念住爲加
 行彼一切加行無間道時若依第二靜慮以道智離
 第二靜慮乃至非想非非想處染若卽以此及緣出
 縱尋苦集智世俗法念住爲加行彼一切加行無間
 解脫道時惟除離有頂染最後解脫道如依第二靜

住爲加行彼加行道九無間道八解脫道時若依無色定以道智時解脫練根作不動若卽以此及緣出離尋世俗法念住爲加行彼加行道九無間道八解脫道時若以緣出離尋苦集道智世俗法念住雜修上三靜慮時若依上三靜慮引發緣出離尋他心智通宿住隨念智通時若依靜慮中間乃至第四靜慮起無量時若起緣出離尋無色解脫時若依靜慮中間乃至非想非非想處起緣出離尋法念住時諸有欲令一切法是勝義者依靜慮中間乃至第四靜慮起緣出離尋苦集道智世俗法念住義無礙解時依

無色定起緣出離尋道智世俗法念住義無礙解時若依靜慮中間乃至非想非非想處起緣出離尋辯無礙解時若起緣出離尋願智邊際定及入滅盡定想微細心時是名善染汙者謂緣出離尋起薩迦耶見執我我所廣說如前無記者謂緣出離尋起非如理非不如理作意於如是時思惟出離尋不起出離尋有起出離尋亦思惟出離尋謂緣出離尋起出離尋如出離尋長時相續現在前時緣自相續過去未來及他相續三世出離尋問此說在何位答此說依未至初靜慮初緩頂忍及增長忍位起緣三諦法念

詩經

卷之三

卷之二

住若增長煖頂位起緣出離尋法念住若起世第一
法若已入正性離生苦集道現觀各四心頃若以世
俗道苦集道智離欲界染若卽以此爲加行彼一切
加行無間解脫道時若依未至初靜慮以苦集道智
離初靜慮染若卽以此及緣出離尋世俗法念住爲
加行彼一切加行無間解脫道時卽依彼二地以通
智離第二靜慮乃至非想非非想處染若卽以此及
緣出離尋苦集智世俗法念住爲彼加行彼一切加
行無間解脫道時惟除離有頂染最後解脫道卽依
彼二地以苦集道智信勝解練根作見至若卽以此

及緣出離尋世俗法念住爲加行彼一切加行無間
解脫道時卽依彼二地以道智時解脫練根作不動
若卽以此及緣出離尋苦集智世俗法念住爲加行
彼加行道九無間道八解脫道時若以緣出離尋苦
集道智世俗法念住雜修初靜慮時若依初靜慮引
發緣出離尋他心智宿住隨念智通時若依未至初
靜慮起無量時及緣出離尋法念住時諸有欲令一
切法是勝義者依未至初靜慮起緣出離尋苦集道
智世俗法念住義無礙解時卽依彼二地起緣出離
尋辯無礙解時有說卽依彼二地起空空無願無願

時如是等時起出離尋亦思惟出離尋有不起出離尋亦不思惟出離尋謂除前相問此說在何位答此說依靜慮中間乃至第四靜慮初煖頂忍及增長忍位起緣滅諦法念住若增長煖頂位起身受心念住及緣餘法法念住若已入正性離生滅現觀四心頃若依靜慮中間以滅智離初靜慮染以身受心念住及緣餘法法念住爲加行彼一切加行無間解脫道時卽依靜慮中間以苦集滅智離第二靜慮乃至非想非非想處染以身受心念住及緣餘法法念住爲加行彼一切加行無間解脫道時若依第二靜慮近

分離初靜慮染以身受心念住及緣餘法法念住爲加行彼加行道解脫道時若依第二靜慮以苦集滅智離第二靜慮乃至非想非非想處染以身受心念住及緣餘法法念住爲加行彼一切加行無間解脫道時如依第二靜慮乃至依無所有處亦爾者依第三靜慮近分離第二靜慮染若卽依此以身受心念住及餘法法念住爲加行彼一切加行無間解脫道時如依第三靜慮近分離第四靜慮染諸說無色近分亦爾若依空無邊處近分離第四靜慮染諸說無色近分有別綠者彼說若卽依此以身受心念住及緣餘法法念

論

方圓身口論卷二十一

十一

解

住爲加行諸說無色近分無別緣者彼說若卽依此以緣餘法法念住爲加行彼一切加行無間解脫道時如依空無邊處近分乃至依非想非非想處近分亦爾若依非想非非想處爲能彼染起身受心念住及緣餘法法念住爲加行彼加行道時若依靜慮中間乃至第四靜慮以滅智信跡解凜根作見乃至以身受心念住及緣餘法法念住爲加行彼加行無間解脫道時若依靜慮中間乃至無所有處以苦集滅智時解脫練根作不動以身受心念住及緣餘法法念住爲加行彼一切加行無間解脫道時若依非想

非非想處時解脫爲練根作不動故以身受心念住及緣餘法法念住爲加行彼加行道時若以身受心念住及緣餘法法念住雜修上三靜慮時若依上三靜慮引發神境天眼天耳及緣餘法他心智宿住隨念智通時若依靜慮中間第二靜慮起初二解脫前四勝處時若起第三第八解脫後四勝處十徧處時若起身受心念住及緣餘法法念住四無色解脫時若依靜慮中間乃至第四靜慮起不淨觀及依靜慮中間第二第三靜慮近分起持息念時若依靜慮中間乃至非想非非想處起身受心念住及緣餘法法

60123456789 70123456789 80123456789

念住時諸有欲令一切法是勝義者依靜慮中間乃至非想非非想處起身受心念住及緣餘法法念住義無礙解及有欲令惟涅槃是勝義者卽依彼諸地起義無礙解時卽依彼諸地起身受心念住及緣餘法法念住辯無礙解時依靜慮中間乃至第四靜慮起法無礙解時有說及依靜慮中間起詞無礙解時若起身受心念住及緣餘法法念住願智邊際定及入滅盡定想微細心時若起無諍時若依靜慮中間乃至非想非非想處起空空無願無願無相無相時如是等時不起出離尋亦不思惟出離尋如出離尋

無恚尋無害尋亦爾三惡尋三善尋廣說如雜蘊思納息

阿毗達磨大毗婆沙論卷第一百九十四

說一切有部發智

桐城弟子趙士先施貲刻此
阿毗達磨大毗婆沙論第一百九十四卷 計
字六千七百三十箇該銀三兩三錢六分五厘
雙足庵釋真慧對長洲徐普書溧水端司堯刻
萬曆丙辰歲仲秋八月徑山化城識

論

大毗婆沙論卷一百九十五

七

七

大毗婆沙論卷一百九十五解序

阿毗達磨大毗婆沙論卷第一百九十五

五百大阿羅漢等造

唐三藏法師玄奘奉詔譯

見蘊第八中三有納息第二之四

諸法因無明此法緣無明耶乃至廣說問何故此中依明無明而作論答彼作論者意欲爾故乃至廣說有說此二是雜染清淨根本法故謂一切雜染無明爲根本如說所有種種惡不善法若生若長皆以無明爲根爲集爲種類爲等起一切清淨明爲根本如說所有種種善法若生若長無不以明爲根爲集爲

論

六祖法傳卷二真身

十一

摩五

種類爲等起有說此二俱是上首法故謂世尊於契經中說此二種爲上首法如說苾芻無明爲上首無明爲前相種種惡不善法皆得生起又由此成無慚愧者明爲上首明爲前相種種善法皆得生起又由此成有慚愧者有說此二是近相障對治法故謂無明是明近障明是無明近對治有說此二是所共知相違法故謂無明違明明違無明有說此二俱緣相攝不相攝四聖諦故俱緣不相攝有漏無漏法故俱緣不相攝有爲無爲法故由此等種種因緣彼作論者依明無明而作斯論然明無明爲因緣法品類差

別有十一種彼欲界繫有四種謂善不善有覆無記無覆無記色界繫有三種除不善無色界繫亦爾及無漏法此中欲界繫善法明無明俱非其因並作三緣謂等無間所緣增上不善法無明爲其四因謂相應俱有同類偏行亦爲作四緣明非其因爲作二緣謂所緣增上欲界繫有覆無記法無明爲其四因謂相應俱有同類偏行亦爲作四緣明非其因爲作一增上緣欲界無覆無記法除無明異熟無明非其因爲作三緣謂等無間所緣增上明非其因爲作一增上緣無明異熟無明爲作一異熟因爲作三緣謂因

論

六祖法傳卷二真身

十一

摩五

等無間增上非所緣以彼異熟在五識故明非其因爲作一增上緣色界繫善法明無明俱非其因並作三緣謂等無間所緣增上色界有覆無記法無明爲其四因謂相應俱有同類徧行亦爲作四緣明非其因爲作二緣謂所緣增上色界繫無覆無記法無明非其因爲作三緣謂等無間所緣增上明非其因爲作一增上緣如色界三種無色三種亦爾無漏法無明非其因爲作二緣謂所緣增上除初無漏餘無漏法明爲其三因謂相應俱有同類爲作四緣除初明餘初無漏法明爲其二因謂相應俱有或一因謂俱

有爲作二緣謂因增上初明非其因爲作一增上緣是謂此處略毗婆沙諸法因無明彼法緣無明耶答若法因無明彼法緣無明此中因無明諸法以種類言之彼法以無明爲五因謂相應俱有同類徧行異熟緣無明者卽因無明法以種類言之無明爲其四緣有法緣無明不因無明謂除無明異熟諸餘無覆無記行及善行無明於彼法或爲三緣或爲二緣或爲一緣而非其因諸法因明彼法緣明耶答若法因明彼法緣明此中因明諸法以種類言之彼法以明爲三因謂相應俱有同類緣明者卽因明法以種

類言之明爲其四緣有法緣明不因明謂初明及諸有漏行明於彼法或爲三緣或爲二緣或爲一緣而非其因諸法因無明彼法緣明耶答若法因無明彼法緣明此中因無明諸法以種類言之彼法以無明爲五因如前說緣明者卽因無明法以種類言之明爲其二緣謂所緣增上有法緣明不因無明謂除無明異熟諸餘無覆無記行及善行明於彼法或爲四緣或爲三緣或爲二緣或爲一緣無明非其因諸法因明彼法緣無明耶答若法因明彼法緣無明此中因明諸法以種類言之彼法以明爲三因謂相應俱

有同類緣無明者卽因明法以種類言之無明爲其二緣謂所緣增上有法緣無明不因明謂初明及諸有漏行無明於彼法或爲四緣或爲三緣或爲二緣或爲一緣明非其因諸法因無明彼法不善耶答若法不善彼法因無明此中因無明不善法以種類言之彼法以無明爲四因謂相應俱有同類徧行有法因無明非不善謂無明異熟及有覆無記行種類言之明異熟以無明爲一異熟因有覆無記行此中無以無明爲四因謂相應俱有同類徧行而彼法非不善是無記故諸法因明彼法善耶答若法因明彼法

論語 卷第十一 爭辯篇第十一

四

周易

善此中因明善法以種類言之彼法以明爲三因謂相應俱有同類有法善不因明謂初明及善有漏行此中初明是善而不以明爲因無前及俱明故善有漏行亦不以明爲因無因義故頗有不因明不因無明彼法非無因耶答有謂除無明異熟諸餘無漏無記行及初明善有漏行如是諸法不因明不因無明而非無因於中除無明異熟諸餘無漏無記行以種類言之有四因謂相應俱有同類異熟初明有二因謂相應俱有善有漏行以種類言之有三因謂相應俱有同類問初明俱無漏得亦不因明不因無明而

非無因此中何故不說答此文應作是說及初明彼俱無漏得而不說者當知此義有餘有說此得攝在初明俱有因中是以不說彼不應作是說得非初明俱有因故應言攝在初明品中若說初明當知已說彼聚諸法明無明義廣說如雜蘊緣起納息見蘊第八中想納息第三之一

諸法無常想生彼法無常想相應耶如是等章及解章義既領會已應廣分別問何故作此論答爲止愚相應法執相應法非實者意顯相應法決定實有故作斯論諸法無常想生彼法無常想相應耶答應作

四句有法無常想生非無常想相應謂無常想現前必滅餘想現前必生彼相應法此中說無常想無間無常苦想乃至滅想隨一現在前彼相應法者謂除想餘九大地法十大善地法有尋有伺地尋伺無尋惟伺地伺及心如是諸法無常想生無常想爲等無間緣而起故非無常想相應與苦無我想乃至滅想隨一相應故有法無常想相應非無常想生謂餘想現前必滅無常想現前必生彼相應法此中說無常苦想乃至滅想隨一無間無常想現在前彼相應法者謂除想餘九大地法等廣說如上如是說法無常

想相應非無常想生無常苦想乃至滅想隨一爲等無間緣而起故有法無常想生亦無常想相應謂無常想現前必滅無常想現前必生彼相應法此中說後無常想聚中除無常想餘心心所法廣說如上如是諸法無常想生無常想爲等無間緣而起故亦無常想相應彼聚中有故無常想雖從無常想生而非無常想相應以自性於自性三因緣故不相應如前說有法非無常想生亦非無常想相應謂餘想現前必滅餘想現前必生彼相應法此中說無常苦想乃至滅想隨一無間隨一現在前彼諸想相應法廣說

論

大藏經論卷一百一十五

大

序

如上如是諸法非無常想生餘想爲等無間緣而起故亦非無常想相應與餘想相應故如無常想乃至滅想亦爾隨其所應皆作四句如是便有十種四句諸法無常想生彼法無常想一緣耶乃至廣說問何故作此論答欲止愚於所緣體性執所緣性非實有法顯所緣性決定實有故作斯論諸法無常想生彼法無常想一緣耶答應作四句有法無常想生非無常想一緣謂無常想現前必滅餘想現前必生彼有餘緣此中說緣色蘊無常想無間緣受等蘊無常苦想苦無我想隨一現在前緣餘蘊及界處說亦爾彼

法從無常想生非無常想一緣緣餘法故有法無常想一緣非無常想生謂餘想現前必滅無常想現前必生彼有此緣此中說緣色等蘊無常苦想苦無我想隨一無間即緣彼蘊無常想現在前界處說亦爾彼法無常想一緣不從無常想生無常苦想苦無我想隨一爲等無間緣而起故問此中說何想與何想同一緣耶爲說無常想與無常想同一緣爲說無常想與餘想同一緣設爾何失二俱有過若說無常想與無常想同一緣者此文云何通如說彼有此緣若說無常想與餘想同一緣者此文復云何通如說彼

法非無常想生有時彼想從無常想生故答此中說無常想與無常想同一緣故言無常想一緣問若爾此文云何通如說彼有此緣有說此文應作是說謂餘想現前必滅無常想現前必生彼相應法此則說無常想相應法與無常想相應如是說者此中攝三想謂無常想後起餘想餘想後復起無常想於中說後起無常想與前無常想同緣故言無常想一緣如是則二文善通或有於此作如是問今應思擇此中說何想與何想同一緣耶爲說無常想與餘想同一緣爲說餘想與無常想同一緣耶此二何差別若說

無常想與餘想同一緣者此文云何通如說有法無常想一緣若苦無我想無間無常想生彼與苦無我想同一緣非無常想若說餘想與無常想同一緣者有時彼法從無常想生則不應說非無常想生有說此中說無常想與餘想同一緣問若爾者此文云何通如說有法無常想一緣答應作是說謂餘想現前必滅無常想與餘想同一緣如是說者此中應說無常想與無常想同一緣是故此中總攝三想謂初無常想次起餘想餘想無間復起無常想此中說後

生無常想與前生無常想同一緣如是則二過俱離
有法無常想生無常想一緣謂無常想現前必滅無
常想現前必生彼有此緣此中說綠色等蘊無常想
無間卽緣彼蘊無常想現在前界處說亦爾彼法從
無常想生亦與無常想同一緣有法非無常想生亦
非無常想一緣謂餘想現前必滅餘想現前必生彼
有餘緣此中說綠餘蘊無常苦想苦無我想隨一無
間緣餘蘊無常苦想苦無我想隨一現在前界處說
亦爾彼法非無常想生餘想爲等無間緣而起故亦
非無常想一緣餘想餘緣故如無常想乃至滅想亦

爾問此所說中餘想可爾不淨想狀食想過去緣過
去現在緣現在未來生者緣未來云何得成第三句
耶答依相似說亦無有過謂前不淨想緣骨鑠而滅
後不淨想復緣骨鑠而生以境相相似故亦名一狀
食想亦爾諸法由心起非不由心乃至廣說前業蘊
中顯示愛非愛果由心而起分位差別此中顯示身
語二業由心而起分位差別心有二種謂轉隨轉轉
謂能引身語二業在彼前起隨轉謂助身語二業與
彼俱生此中說轉不說隨轉問所說諸法謂是何耶
或有說者是別解脫律儀若作是說諸法是別解脫

論

大藏經卷之五十五

九

麻五

律儀者彼說諸法由心起者謂別解脫律儀心力所引起非不由心者無有離心力而得彼律儀若時心起爾時彼法耶答心先起後彼法謂先起如是心我當受別解脫律儀後便正起律儀表業若時心滅爾時彼法耶答心先滅後彼法謂彼心先生已滅後彼律儀表業生已復滅所以者何諸行無常所吞生已無力能暫停住刹那無間必謝滅故若時心得爾時彼法耶答心先得後彼法謂彼善心由二緣故得一善根相續二界地來還彼律儀由表故得若時心捨爾時彼法耶答彼法先捨後乃心謂彼律儀由四緣

故捨一捨學處二二形生三善根斷四捨衆同分有說犯根本罪時亦捨彼心由二緣捨一善根斷二越界地問若欲界命終還生欲界者可先捨彼法後乃心若欲界命終生色無色界及般涅槃者彼法與心俱時而捨云何得說彼法先捨後乃心耶答此中但說欲界命終還生欲界者彼命終時捨衆同分故別解脫律儀亦捨雖捨衆同分而不捨心有說欲界命終生色無色界及般涅槃者亦是此中所說彼將死儀後命終時其心方捨問若爾云何可說某苾芻命時身方羸劣或斷末摩苦所觸故便失所受身語律儀後命終時其心方捨問若爾云何可說某苾芻命

終答仍本名故無過如王失位猶名爲王問彼衣盜等諸出家者云何得分答彼於昔時亦曾分他如是財物今時命過他還分之又是先來遞傳所許曾聞昔有仙人命終同梵行者以其財物輸納於王而作是言此是某仙所有資產彼無繼嗣今持與王願爲納受王令持還而語之言諸出家者所受用物我等俗人不應受用從今已去諸出家者若當命終所有資具同梵行者應共分之由是開許故無有過評曰如前所說者好所以者何苦觸非是捨戒緣戒終故本所要期乃至命終非命未終離斷善等而令戒捨

是故最後命終刹那心與律儀一時俱失若時心受異熟爾時彼法耶答或爾時或餘時爾時者謂一刹那或一相續或一分位或一衆同分餘時者謂異刹那或異相續或異分位或異衆同分以現在時有四種故復有說者諸法謂不律儀若作是說諸法是不律儀者彼說諸法由心起者謂不律儀心力所引起非不由心者無有離心力而得不律儀若時心起爾時彼法耶答心先起後彼法謂先起如是心我當受作如是事業後便正起不律儀表業若時心滅爾時彼法耶答心先滅後彼法謂彼心先生已滅後不律

儀生已復滅所釋如前若時心得爾時彼法耶答心
先得後彼法謂彼不善心由二緣故得一從離欲退
二界地來還彼不律儀由表故得若時心捨爾時彼
法耶答彼法先捨後乃心謂不律儀由四緣故捨一
受律儀二得靜慮三二形生四捨衆同分彼不善心
由一緣捨謂離欲染時若時心受異熟爾時彼法耶
答或爾時或餘時如前釋復有說者諸法謂非律儀
非不律儀所有身語妙行惡行若作是說諸法是非
律儀非不律儀所有身語妙行惡行者彼說諸法由
心起者謂彼身語妙行惡行心力所引起非不由心
者無有離心力而得彼身語妙行惡行若時心起爾
時彼法耶答心先起後彼法謂先起如是心我當作
如是如是事業後便正起彼身語表若時心滅爾時
彼法耶答心先滅後彼法如前釋若時心得爾時彼
法耶答心先得後彼法謂彼善心二緣故得一善根
相續二界地來還彼不善心亦二緣故得一從離欲
退二界地來還彼身語妙行惡行由表故得若時心
捨爾時彼法耶答彼法先捨後乃心謂彼身語妙行
惡行三緣故捨一意樂息二捨加行三勢力盡彼善
心二緣故捨不善心二緣故捨皆如前說若時心受

論

方廣經疏卷之二十一

二

廣五

異熟爾時彼法耶答或爾時或餘時如前釋頗有法
 是所通達所徧知乃至廣說問何故作此論答欲止
 他宗顯已義故謂或有說所通達所徧知非實有法
 或復有說無漏有爲亦是所斷或復有說加行所起
 無覆無記亦是所修或復有說惟有涅槃是所作證
 欲止此等意起明所通達所徧知是實有法所斷惟
 是有漏所修惟善有爲所證通一切善及依定所起
 無覆無記故造斯論所通達者謂一切法皆是善慧
 所通達故所徧知者謂一切法皆智徧知所徧知故
 如說所通達云何謂一切法所徧知云何謂一切法
 所斷者謂一切有漏法是對治道所應斷故如說所
 斷法云何謂一切有漏法所修者謂一切善有爲法
 是得修習修隨一或俱故如說所修法云何謂一切
 善有爲法所作證者謂一切善及依定所起無覆無
 記是可欣尚求得彼故如說所作證法云何謂一切
 善法及依三摩鉢底所起無覆無記天眼天耳頗有
 法是所通達所徧知非所斷非所修非所作證耶答
 有謂虛空非擇滅如是二法是所通達是善慧所通
 達故亦是所徧知是智徧知所徧知故非所斷無漏
 故非所修無爲故非所作證非可欣尚求得法故頗

論

三

五

有法是所通達所偏知非所斷非所修是所作證耶
 答有謂擇滅此是所作證是可欣尚求得法故餘如
 前釋頗有法是所通達所偏知非所斷是所修是所
 作證耶答有謂無漏有爲法此是所修善有爲故餘
 如前釋頗有法是所通達所偏知是所斷是所修是
 所作證耶答有謂善有漏行此是所斷有漏故餘如
 前釋頗有法是所通達所偏知是所斷非所修是所
 作證耶答有謂定所起天眼耳此是所斷有漏故非
 所修無記故是所作證依定所起求得彼故餘如前
 釋頗有法是所通達所偏知是所斷非所修非所作
 證耶答有謂除定所起天眼耳餘無記行不善法義
 如前釋問外國諸師說所作證無覆無記法有八種
 謂依定所起天眼天耳及彼二識無覆無記法詞二
 無礙解願智變化心此中何故但說天眼天耳非餘
 法耶答外國諸師所誦文句作如是說所作證法云
 何謂一切善法及依三摩鉢底所起無覆無記法迦
 濡彌羅國諸師亦應作是說而不說者有別意趣謂
 依定所起天眼耳識攝在所說天眼耳中若說所依
 當知已說依者法詞二無礙解及願智皆惟是善亦
 是所修非此所攝不應責問變化心似工巧轉非甚

欣尚此中不說以是故不隨彼所說復次若依加行
正所求得者是增上故此中說之天眼耳識無別加
行但因所求天眼耳得諸變化心因起加行求離染
得皆非增上故此不說復次天眼天耳廣設加行暫
時成就是爲希有故此說之彼識及變化心因離欲
染或眾地還時不用功而得得已恒時三世成就非
謂希有故此不說復次天眼天耳是修果故是攝受
支定果故離欲染後能現前故於一切時識不空故
起必無有彼同分故但成就者必作用故是眼耳通
所依止故是歟生死勝根本故此中說之餘法不爾
是故不說此中所說非擇滅者謂滅非離繫非擇法
所得諸補特伽羅得時不離繫縛所說擇滅者謂滅
是離繫是擇法所得諸補特伽羅得時便離繫縛此
二減廣說如雜蘊愛敬納息頗有法無緣因緣無緣
法緣無緣法俱生乃至廣說問何故作此論答欲止
他宗顯已義故謂或有說諸有爲相無實體性如譬
喻者所說所以者何彼說諸有爲相是不相應行行
蘊所攝諸不相應行皆無實體或復有說諸有爲相
是無爲法如分別論者所說所以者何彼作是說若
有爲相是有爲者其力羸劣何能生他乃至令減以

60 1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

論

方田安詩卷二十一

三

麻王

是無爲故便能生法乃至滅法或復有說有爲相中
生老住是有爲滅是無爲所以者何彼說諸法令生
老住則易令滅則難若無常相是有爲者其性羸劣
何能滅他以是無爲故其性強盛能滅諸法或復有
說色法生老住無常體即是色餘亦如是或復有說
諸有爲相是相應法爲止如是種種異執顯有爲相
是實有性非無爲法非卽色等是不相應故造斯論
頗有法無緣因緣無緣法緣無緣法俱生是有是有
性非無非無性異色異受想識異相應行耶各有謂
五識身彼相應法及緣色無爲心不相應行意識身

彼相應法所有生老住無常此法無緣是不相應行
無所緣故此因緣無緣法緣無緣法俱生以前所說
六識身及相應法爲因卽與彼俱生故由此已遮執
有爲相是無爲者意非無爲法從因生故此是有非
無法故是有性非假法故非無非無性此爲決定前
所說義復次前二句成立已論後二句遮破他論成
立已論者如善說法者成立善說法宗惡說法者成
立惡說法宗應理論者成立應理論宗分別論者成
立分別論宗遮破他論者如善說法者遮破惡說法
宗惡說法者遮破善說法宗應理論者遮破分別論

論

卷二十一

二十一

麻理

宗分別論者遮破應理論宗今此亦然前二句成立自宗後二句遮破他宗若不成立自宗便破他者則爲空論無所依故若但成立自宗不破他者則於自宗非善成立是故先立已宗後破他論義言此生老住無常有如是理趣法爾是有是有性非無非無性由此已遮執有爲相非實有者意此異色非色法故異受想識非受想識法故由此已遮執色等相即是色等此異相應行是不相應法故由此已遮執有爲相是相應法此法於彼法當言因當言緣耶答當言因當言緣此中何謂此法何謂彼法有作是說生老住無常是此法此俱六識身及相應法是彼法若是說者彼說若此法於俱起彼法當言因當言緣因者一因謂俱有緣者二緣謂因增上若此法於後起彼法亦當言因當言緣因者三因謂同類偏行異熟緣者三緣除等無間若此法於前起彼法當言緣不當言因緣者二緣謂所緣增上若此法總於彼法當言因當言緣因者四因謂俱有同類偏行異熟緣者三緣除等無間復有說者前所說六識身及相應法是此法此俱生老住無常是彼法若作是說者彼說若此法於俱起彼法當言因當言緣因者一因謂俱

論

卷二十一

二十一

麻理

論

大藏經卷二十一

二

廣

有緣者二緣謂因增上若此法於後起彼法當言因當言緣因者三因謂同類徧行異熟緣者二緣謂因增上若此法於前起彼法當言緣不當言因緣者一緣謂增上若此法總於彼法當言因當言緣因者四因謂俱有同類徧行異熟緣者二緣謂因增上復有說者卽前生老住無常是此法此同類生老住無常是彼法若作是說者彼說若此法於俱起彼法當言因當言緣因者一因謂俱有緣者二緣謂因增上若此法於後起彼法當言因當言緣因者三因謂同類徧行異熟緣者二緣謂因增上若此法於前起彼法

當言緣不當言因緣者一緣謂增上若此法總於彼法當言因當言緣因者四因謂俱有同類徧行異熟緣者二緣謂因增上復有說者卽前所說生老住無常是此法此生同類生乃至此無常同類無常是彼法若作是說者彼說若此法於俱起彼法當言因當言緣因者一因謂俱有緣者二緣謂因增上若此法於後起彼法當言因當言緣因者三因謂同類徧行異熟緣者二緣謂因增上若此法於前起彼法當言因當言緣不當言因緣者一緣謂增上若此法總於彼法當言因當言緣因者四因謂俱有同類徧行異熟緣者

二緣謂因增上此法當言善耶不善耶無記耶答於
 善法當言善於不善法當言不善於無記法當言無
 記以生所生乃至滅所滅性類必同故此法幾隨眠
 隨增幾結繫耶答三界有漏緣隨眠隨增九結繫問
 何故不說此法無漏緣隨眠隨增耶答由二緣故隨
 眠隨增一所緣故二相應故無漏緣隨眠無所緣故
 隨增境解脫故雖有相應故隨增而於此無不與此
 相應故此中依種類總說故言三界有漏緣隨眠隨
 增九結繫若別說者欲界於欲界乃至無色界於無
 色界見苦所斷一切及見集所斷徧行於見苦所斷

見集所斷一切及見苦所斷徧行於見集所斷見滅
 所斷有漏緣及徧行於見滅所斷見道所斷有漏緣
 及徧行於見道所斷修所斷一切及徧行於修所斷
 欲界九結於欲界色界六結於色界無色界六結於
 無色界如是三界有漏緣隨眠及九結於此法皆由
 所緣故隨增及繫非相應故諸有爲相廣說如雜蘊
 色納息

阿毗達磨大毗婆沙論卷第一百九十五

說一切有部發智

音釋

骨鑼

鑼蘇果切骨鑼謂益骸骨相連瑣也

益

鉢末切遞代也

60

1 2 3 4 5 6 7 8 9 10 1 2 3 4 5 6 7 8 9 10

80

1 2 3 4 5 6 7 8 9 10 1 2 3 4 5 6 7 8 9 10



浮渡居士吳用先施貴刻此
阿毗達磨大毗婆沙論第一百九十五卷 許
字七千六百七十三箇該銀三兩八錢四分
雙足庵釋真慧對長洲徐普書涇縣徐世繼刻
萬曆丙辰歲奉正月徑山化城識

シ一十九

60 1 2 3 4 5 6 7 8 9 70 1 2 3 4 5 6 7 8 9 80 1 2 3 4 5 6 7 8 9